



卷之二十一
人物志
官蹟下

ル 5
3258
21



門 儿 5
號 3253
卷 21

黃州府志卷之二十一

黃州府知府英 啟纂輯

人物志

官蹟下

國朝

黃岡縣

汪淪南字涵天明崇禎癸酉舉人順治二年授吳縣知縣充鄉
試同考稱得人張九徵繆彤皆出其門調貴溪有岡搗山賊
數千人為患淪南示以威信親入砦招撫賊首周飛雄盡降
其眾累官河南知府所至有聲著有天鏡堂遺稿

陳瑾字公瑜家貧好學明崇禎甲戌進士順治初用薦辟起禮

黃州府志卷之二十一 官蹟下

昭和七年
十月八日
購求

部郎中尋督學福建拔孤寒杜請謁權貴不敢干以私暇與

諸生論文講道及歸行李蕭然著有陳子性書子際昌貢生

際鼎蔚州知州孫應鳳保康訓導俱克世其家福建名宦志

陳克峻字伯鳴明崇禎乙亥拔貢生順治初授虹縣知縣有清
名歲旱設法賑救全活萬人以母艱歸課子著書不與外事
年八十卒

詹謹之字仲庸時明子明崇禎丙子舉人順治初授濟南推官
釐清宿弊力卻鹽引及嶽廟各陋規訊讞務得實情全活甚
眾尋以疾歸杜門著述卒祀鄉賢從子大有以舉人為金谿
知縣嚴介自持不避權貴一時誣挾者屏息崇儒尚禮谿人
思之亦祀鄉賢子大衢大衢俱有文行衢詳文苑

孫錫蕃字棐臣應鴻子少工詩文明崇禎己卯拔貢生順治初

任公安訓導為學根極理要一宗紫陽課士十則以躬行實

踐為先士風不變歷遵化雷化知縣均有清惠聲嘗纂修公

安縣志及本邑志子寅寓孫鏗鏞皆有文行

晏濟明崇禎壬午舉人順治初為鳳陽推官治獄平反者眾他

郡疑獄不決悉就理焉為守所忌罷歸年八十二卒

韋成賢字念我祖石麟明進士戶部郎中督臨清倉以廉著父

克振雄才博學以薦授甯波知府成賢順治丙戌進士選庶

吉士丁亥充會試同考得人最盛遷侍讀出為江南參政督

理糧儲滌除宿弊賦足而民不擾陞右通政使以丁外艱哀
毀卒

操志葵字我忠順治三年由例貢任蘭谿縣丞剿白頭賊有功

授蘭谿知縣廉潔自持輕徭減賦人無敢干以私

凌建奇字仲平順治戊子舉人積學篤行丰采嶷然曹本榮劉

子壯皆師資之授翰林院孔目奉

命册封安南能稱職

世祖嘉之賜象骨扇異數也尋典試山東卒於官

王躬允字爾極順治歲貢生隨大軍赴粵授澄海知縣下車訪

疾苦問利弊大姓陳退夫集萬人壁鷓汀以自保有楊許者

素劫掠先歸命構鷓汀鷓汀懼不敢出躬允廉得其情單騎

儒服往壁人望見曰王使君來我輩數萬人活矣自縛出迎

事得解城隅有故宅時為崇居民皆徙避躬允以文榜其宅

崇不復作蒞澄三載治行為全粵最解組歸卒年八十有六

陳士銘字大新為諸生時豪爽好談兵講求天文及山川阨塞

順治六年以鄖陽守備剿流寇身經百餘戰未嘗挫衄賊平

以軍功累擢總兵鎮守寶慶卒於官

程啓朱字念伊博學有經濟才順治己丑進士授神木知縣以

最擢刑曹出知衛輝府招集流亡撫以慈惠在任十八年擢

山西鹽運副使衛人思之二年卒於官詩載百名家選子奕

契樊俱有聲奕字禹甸由保山知縣擢西安同知以廉靜稱

李君柱順治七年從征入粵授新安知縣潔已奉公勞心撫字

時營兵肆暴守備王守祖復縱之君柱力爭不得投劾去上

官廉得其實守祖被劾民益感君柱之德

廣州名宦志

杜碩字芳洲順治甲午舉人榜姓楊性至孝父病兩載不解衣

三日始一食父沒痛不欲生後除博羅知縣償逋欠懲蠹蝕

革陋規均田糧士民以忠孝廉明歌之弟衡字草臣己亥進

士平山知縣有文名博羅名宦志

熊光裕字肅行順治乙未進士授榆次知縣課最濬陞杭嚴道

修築海塘實資保障署按察使民無冤獄悍兵攘奪移文提

督禁飭境內肅然又以鹽價日騰請提鹽引民被其惠以老

致仕卒於家見浙江通志李漁資治新書

汪嶼南字與山性孝友父世植明末死雅淡洲之亂嶼南守父

屍不忍去賊至逼入江不沈逆流上舟人拯之順治丁酉舉

於鄉授廣東新安知縣邑素有苗患嶼南撫其酋遂不復叛

以艱歸士民送於分水塘為清水分流之頌後授武邑邪民

為亂大吏以疲卒五十使往嶼南慷慨赴敵民望風降及歸

築室江洲以老

陳肇昌字扶昇順治戊戌進士授寶雞知縣招徠撫字蠲除逋

賦民懷其惠歷陞戶部郎中督學廣東時兵燹後士多流亡

肇昌加意培養申明條約嚴飭學校嶺表士風賴以起衰考

最陟僉都御史授順天府尹九卿廷試會推秋讞諸大政多

從其議條上輒報可生平好汲引人才凡所薦達多為名臣

卒祀鄉賢著有三楚文獻錄一百卷湖廣通志若干卷詩文

集若干卷嘗命諸子從名儒陸隴其游故其後多以德業顯

子大章詳儒林大華詳文苑大年大羣大輦自有傳

汪士奇字凡子順治己亥進士授東鄉知縣康熙十三年賊兵肆掠士奇練鄉勇保障孤城復設奇制勝盡追賊所擄男婦數千人而還賊平興學校育人才士民愛戴累官刑部郎中孫度宏詳孝友

吳升東字巢薇順治己亥進士授登州推官時于七叛案株連大獄滋起升東反復讞鞫全活無算陞浙江道監察御史風裁侃侃知無不言以條陳免官旋奉

旨起復協理河南道事予告歸卒著有玉磬齋瑞芝堂等集

王追騷字里之同觀子順治庚子舉人任健為知縣縣故瘠供膳例派里甲追騷悉捐之興學勸士文治遂盛擢刑部主事多所平反乞歸有百餘人焚香跪道左詢之則署廣西司時

所釋死囚也謝之感泣而去孫封渭進士猗氏知縣有文名宋必達字其在順治辛丑進士授甯都知縣請免清泰懷德二鄉逋賦招集流亡適閩賊張志在阻兵窺贛南圍甯都必達率義勇與營帥協力破走之境賴以安己奉檄誅黨亂者必達抗言良民協從願以官職保其無他全活甚眾解組歸中途為賊所劫繫密室中夜半忽有多人持兵仗大呼宋公擁以去蓋甯都百姓也卒祀鄉賢子敏求康熙戊午舉鄉試第一己未成進士授檢討有文名孫鏗貢生肥鄉知縣清慎自矢善政甚多

江西名官志

龍可旌號鶴皋順治辛丑進士授濟陽知縣初在讞局決疑獄數十起釋株連至數百人洎蒞任鋤強懲猾吏畏民懷濟郡

舊例秋糧輸官至春僅給以正令民解赴水次往返千餘里多賠累可旌廉其弊捐耗免解民立碑頌之著有端峯文稿梁鈇康熙初為長安縣丞攝縣事農民盧某方耕其婦饑之食已噴血死前官治婦罪已成獄鈇訊其由同詣饑所有樹翳其上伐之中盡竭也遂白婦冤

鄭昱字方南先慶子康熙庚戌進士歷建陽唐縣知縣以廉能晉工科給事中有敢言聲出為江西糧道裁陋規數萬盡釋被冤諸生晉廣西按察使持法平允遷安徽布政使范官月餘宿弊一清尋以老乞歸讀書教子不與外事鄉人以爲模楷子可格舉人官中書工詩文江西廣西名宦志鄭繼啓本姓洪成童時躑捷走城堞譬如飛鳥用長矛如雪練

無敢禦者康熙壬子舉武科從提督趙良棟征吳逆平湖南

袁州渡鐵鎖橋先登以軍功擢官副總兵

王風采字汝載躬俊子康熙己未進士授會稽知縣性廉而幹能力任大事邑大嵐山連金甯温台四郡界有白頭賊者乘歲饑誘民為亂風采廉得其魁捕寘於法時有董金氏以姪奪其腴田二百畝叩闕稱浙江無一職官

上賜以黃衣遣歸命督撫鞠之及訊金氏衣黃衣不肯跪風采在下座叱之褫其衣上官俱色動即委風采勘所侵地止七畝疏入

上令再讞卒從風采議上官器之風采治縣以戢豪強安閭左為務而性強記自城市至窮鄉凡狹邪武斷之徒能歷歷指其名

每一牘入懸揣之輒得其主使與曲折之故及坐廳事出片語摘伏竟無遁情蒞任十四年民習而安之以老罷官卒於家訃至浙人為位哭之崇祀名宦並祀鄉賢

浙江名宦 參通志

王懋德字一士欽濂孫康熙壬戌進士授廣靈知縣值荒亂後有招徠生聚功後任甯都歲饑發倉捐賑民得全活尤好振拔孤寒興學勵俗故所至輒有聲弟懋才字國士同榜進士新建知縣亦好汲引人才擢最將遷以疾歸卒

謝加恩字勸菴康熙丁卯舉人任安縣知縣時土荒民少招集區畫眾得歸業興學校教士有法在任八載布衣疏食素履蕭然報最擢主事

蘇州名宦志

萬為隨字靡瞻康熙時歲貢生初知府于成龍平東山賊以為

練長資謀略焉出任桂陽州學正值亂後捐俸倡修學宮進

諸生勉以忠孝大義州鄰苗境多侵掠為隨與州牧李往擒

其魁民獲安堵

桂陽名宦志

陳大年字子山肇昌長子康熙庚午順天副榜授徐溝知縣邑

當燕晉孔道會

聖祖親征噶爾旦芻糧車輛之屬取辦俄頃嘗四出雁門關馳驅無

後期以艱歸起樂清知縣建修隄閘及塘堰各數處報墾田

五千餘畝遷鄧州知州教民修濬溝洫植桑養蠶歲獲屢登

鄧人德之

陳大羣字季超肇昌子嘗從名儒陸隴其遊講明正學康熙庚

午舉於鄉任會理州知州境故邛夔地民俗悍獷不知禮義

大羣至輕徭役抑豪強擇子弟之秀者親爲訓迪夷風一變凡日用經費悉從故鄉營辦不以累民考最累擢戶部郎中引疾歸子師洛舉人有學行

王掄士字以三康熙癸酉拔貢生由教習任武甯知縣剔姦鋤猾興學右文值邑大祲爲粥以賑五閱月咸得全活士民爲建生祠二所比卒囊橐蕭然櫬歸之日送者泣下並祀諸各宦祠著有問津書院志甯國府志永安州志漳平縣志諸書范基祚字叔文少孤酷貧事母孝祖母早逝母田氏事翁撫子茶苦萬狀康熙丁丑基祚成進士授涪川知縣清操自矢案無留牘以最擢吏部主事去任民攀轅不得行父老多泣下者子元灝辛卯舉人官溫縣知縣孫朝綱乾隆辛未進士官

鄒平知縣剿除劇盜數百人鄒人德之晉戶部主事卒於任萬爲恪字敬如爾昌子康熙丁丑進士授遂安知縣釐剔宿弊日坐堂皇令吏卒無事則散俸民得自前言疾苦遂故瘠邑民閒歲約出三千金供官曰幫費爲恪悉屏之值水災先賑而後請吏爭以故事須待報否且得罪不聽既賑並請豁其賦有巨盜毛六謙劉念那爲害爲恪招至開諭之盜感泣爲良民其爲政寬厚多類此後二十年子紳祖經其鄰境擔夫皆邑人予以值不受以遺愛猶尸祝云紳祖詳篤行孫年茂詳儒林廷望年豐自有傳

王一導字子引康熙丁丑進士授德化知縣聽訟無留滯以明慎稱艱歸起知屯留縣值歲耗撫循調恤全活甚眾治最擢

吏部主事雍正間累遷郎中周歷四司剔弊釐姦名譽大起御書得雨詩一章賜之典試浙江稱得人尋授甯紹台道兼理海關執法清嚴商民咸便子封岱舉人因母老不赴選以孝養終孫如鑿自有傳

余琬字用南康熙庚辰進士授四會知縣始至胥吏有獻金者力懲之地濱海經亂丁耗田多蕪請以丁隨糧更募墾給牛種生齒遂殖邑苦盜用其魁治之盜立止建義學立程式人從其教子宏仁陵水知縣多惠政

王漢周字晉侯康熙癸未進士授奉節知縣有廉明聲課最厯官鞏昌知府諸大吏稔其才凡鄰郡重獄委決無虛日多所平反陝人德之以疾卒於官

四川名宦志

陳大輦字子京鞏昌子康熙丙戌進士授永安知州其地搖獞雜處為定嫁娶喪葬之禮調西隆革頑輯暴以治行第一擢福建鹽運分司委丈民田稱平允厯分巡臺廈道至則賑濟饑民撫綏番落生番歸化者八社蒞臺三年以疾卒臺民人持香一束哭階下聲震寢門子師豫純篤嗜學雍正癸卯舉於鄉大輦任臺灣例不得攜家屬憂母徐老無以奉養師豫承父志孝養備至徐嘗曰汝父為清白吏汝復善事我如此可謂忠孝一門矣年三十六卒人咸惜之

王全才字仲默躬俊孫康熙丙戌進士任廣東長甯知縣地偏叢山中嵐重泉毒人咸危之全才曰王陽叱馭何患焉既受事志益厲俗尚巫每假淫祠惑眾取而置諸法並毀其祠風

頓息盜魁吳辛龍嘯聚為民害全才率土兵傾其巢辛龍伏法境賴以安卒於任

靖乃成字我思少警敏具經濟才以歲貢生官漢川訓導遷宿遷知縣邑有地濱黃河崩淤無常民隨淤任種以供正賦前令額外加派民苦之乃成力請奏免圈柳地民產也軍丁冒占訟不休廉得其實斷復本業宿人至今頌焉

周嵩字元峯祖之彬貢生于成龍任知府時以儒林俠骨顏其室父大紳諸生敦行誼嵩孝友勵節操博通羣籍雍正癸卯成進士授大名知縣釐革蠹弊屢決疑獄洩李茂隄水患居民稱便尋攝長垣有重囚稱病取保故於家嵩以違例當削職民哀號乞留巡按御史莫禮博李徽上其事

特旨留任復攝元城威縣政聲益著擢大理評事卒櫬歸過故治民

哭而祭者絡繹於道孫熙鏗監生元孫宗德中書俱以孝稱萬禮祖字履素為境子雍正癸卯進士任安徽太平知縣縣故嵒竄多逋賦為捐貲代償其無知抵冒者訟繫寬挺之嘗語其掾曰為父母不克胥匡以生而使謂浚我以生吾不忍為也解組幾不能歸民醵金贈行不受孫希槐詳文苑汪依仁度宏子雍正甲辰舉人任海陽知縣清介自矢門無私謁聽訟不尚刑威而判斷悉當歲饑捐廉助賑存活甚眾士民為立生祠祀之

胡天健字行旃父正君好施與里有疫徧給棺木助葬資家以是替天健雍正己酉拔貢生懸瀘溪安仁鉛山等縣知縣興

學校均賦役所至有聲雍正十年逆民黃申冠猖獗天健往

勦獲其首閭閻安堵人頌其德子心安自有傳安仁縣志

萬廷望字東表為恪孫乾隆丙辰舉人任定邊知縣縣治流沙

沮洳雨水輒溢入城廷望開渠導之患遂息營兵餉不支縛

副將噪甚徒步往諭一軍感服調米脂以乞養歸卒年八十

萬年豐字武溪為恪孫乾隆丙辰舉人嗜學工詩以知縣借補

浙江石堰鹽課大使鹽筴利病詳悉無遺嘗奉檄丈勘沿海

圩田屏絕餽遺核實具報陋習一清及歸筇中惟端溪石數

片而已

郭維本字有如質直力學弱冠舉乾隆戊午鄉試第一因親老

不赴選晚任公安教諭遷山東萊州鹽大使前官率以緝私

獲利維本曰瘠人肥己吾不為也卒於官櫬不得歸民爭購之著有道菴詩文集

馮子式字汝瞻少隨從父旭任黔中因以黔籍舉乾隆戊午鄉

試壬戌成進士復本籍授永順知縣有疑獄七久莫決子式

至讞悉得情民服焉調麻陽闢荒田設義學治績稱最復調

益陽益著慈惠聲生平負性剛方常以事忤上官略不為動

李長青字松村自幼嚮學苦家貧父子躬耕里中有塾師李芳

深經術力進之長青且耕且讀為文日雄健悉田閒腹稿也

如是者十餘年乾隆戊辰成進士授寶山知縣去之日典商

某訟嘗得直餽以侵卻不受歷蘇松二府同知在蘇時筦錢

局有銅商餽以金正色拒之謂無事而餽有事將何如其人

黃州府志卷之二十一
棟然退擢同州知府沂江將赴陝舟子意有重裝盡去其船中物待之既而反之相與竊笑座師陳兆崙貽書歎美焉生平篤親故李師沒爲置祭田十畝卒祀鄉賢江蘇陝西並祀名宦子鈞簡詳文苑

案長青官寶山時分校鄉闈得人最盛修撰陳初哲其所取士也

通志

胡心安字勉茲天健子乾隆庚午舉於鄉任廣西興安知縣懲姦吏均徭役修葺灘江書院文教聿興大吏閱兵騶從過境勢張甚心安慷慨入訴大吏氣餒戒其下曰勿犯強項令也權知象州移興業訟獄多平反後投劾歸道經興安灘河淺適有長官乘船在其前眾挽之仍不進心安舟最後岸旁耕

者覘知之羣釋未耶許牽挽舟遂前長官爲嗟歎久之孫美彥自有傳

邱恩榮字駕六乾隆辛未進士授萊蕪知縣屢剖疑獄鄰邑蝗起預飭鄉民爲捕蝗具及入境悉滅之調泰安疏治泰山泉源引汶水歸運河民以爲便擢知岳州府姦人有言臨湘可開礦者大吏檄勘恩榮力言不可乃止調衡州衡山縣民曠大忠被誣以仇殺入秋審恩榮復勘得平反後大忠援例入成均子孫游泮水越千里造其門拜墓三次

宋廷採字采持敏求曾孫生而穎異年十九成乾隆辛未進士授南召知縣委訊裕州孀婦疑獄立白其誣賑河北水災多所全活擢南甯同知釐定鹽價民利賴焉遷大理府知府辦

理銅鹽等務大吏優獎以為各屬風服官十餘年聲迹如一
萬廷璧字仍軒乾隆壬申舉人任蕪州興國知縣敝衣羸馬司
閭惟一老僕有鍾氏叔姪以茶山構訟姪乞邑紳以金進廷
璧笑曰若以此金遺官盍遺阿叔其人慙去僧曇亮有藏經
語涉悖謬株連無辜甚眾廷璧力爭不獲遂投劾去子希宗
自有傳

張京鯉號小還乾隆壬申舉人任均州學正教士有法擢江西
上猶知縣歲饑籌賑不敷乃馳信歸家售產益之全活甚眾
家以此貧泊如也

張鳳鳴字虞溪世俊子少有神童目長尤該博經史多闡發乾
隆癸酉舉於鄉以甲戌明通授邯鄲知縣擢知兗州府嘗

召見行在對稱

旨嘉以老於民牧

賜紫貂粧緞諸珍異鳳鳴聰明慈惠所至有聲雖鞅掌不廢著述旁

通兵法陣圖見蒲圻張開東詩集

萬廷瑄字武皋乾隆癸酉拔貢生授合江知縣邑有羣盜盤踞
山谷閒廷瑄偵得渠魁劉天明陳方升寘之法境內肅然會
大軍征緬甸吏謀派編戶供軍行廷瑄斥曰資糧芻屨責在
縣尹何與民事嚴禁之越五年罷歸廷瑄少孤貧力學為文
峭蒨似柳州其楷書尤稱絕技云

宋本敬字賓門如辰孫陳恪勤公鵬年其外祖也往依之因隸
湘潭籍舉乾隆己卯湖南鄉試第一歷長治陽城兩縣知縣

擢鎮安知府清慎廉平始終如一陽城民建祠祀之時同寮

山左顏某亦以清廉著民間有南宋北顏之稱

嚴承夏號橫溪乾隆丙戌進士授孝豐知縣甫蒞任吏進陋規
卻之立除其名自是蠹猾屏息調定海洋盜為害承夏造船
四隻選民壯訓練值大霧躬執弩弋獲百餘人實諸法擢杭
州同知卒於官

靖本誼字伯宜質敏學博乾隆庚寅南元乙未成進士授樂安
知縣地瘠民貧俗多訐訟本誼廉其魁嚴治之巡撫吏鄧某
恃勢佔民田積訟十餘年不決本誼按吏罪以田歸民訟為
止調萬安罷歸

參通志

王如鑿字又溪一導孫乾隆甲午副榜選長陽教諭訓士有方

嘉慶元年偵知邑之朗坪有教匪嘯聚以告邑令令猶豫如
鑿徑稟按察使張長庚飭弁兵七百人進剿不克因委如鑿
同新令分途堵剿如鑿駐向王廟當賊衝誓以身殉賊遠遁
城遂獲全子鶴自有傳

汪兆霖字定山乾隆癸卯舉人初為井陘知縣有循聲調安肅
當畿輔孔道差繁吏擾民多逃亡霖徧履鄉村剔除宿弊再
遷大城徭役尤重每歲酌減數千金以最擢薊州知州

王士珍號華巖道明孫乾隆癸卯舉人授分宜知縣有世家某
控其胞姪士珍舉卓茂語再三諭之某感泣求息遂為伯姪
如初調峽江培土愛民百廢具舉

龍澍號肅齋乾隆甲辰進士授新泰知縣歷金谿贛縣皆以慈

黃州府志 卷之二十一
惠得民賴濱江嘉慶五年甯都蛟水暴漲賴承其下流兩邑
男婦漂沒哭聲不絕澍備船急拯之救一人予錢五千存活
無算其死亡及廬舍蕩析者悉爲安置調繁任南昌晉同知
革寶昌局陋規年七十一卒於任

胡定泰字平川膂力過人善騎射工技擊舉乾隆癸卯武科第
一甲辰成進士以待衛授湖南中營都司征逆苗累戰皆捷
嘉慶二年教匪擾川楚泰從征進兵南漳房縣擒斬數千人
四年擊賊於鳳縣進口關身被數傷仍力戰遂擒賊李槐李
潮殲賊首張漢潮等五年擊廣西五金柱大股賊殲樊龐洪
勝生擒龐有兒楊六燕累功歷官河州鎮總兵在鎮六年兵
民懷畏十一年署甯陝總兵會暑雨蒸溼舊傷復發遂引病

歸泰在軍嚴紀律公賞罰與士卒同甘苦故人皆樂爲用前
後經三百餘戰勞績最著

靖本託乾隆丙午舉順天鄉試選知縣得陝西旣至縮篆興平
時白蓮賊入屋鄆逼縣境當事檄以斷河渡遏賊蹤本託更
益舟以待惟禁持兵器被脅者爭脫歸生全無算尋任郃陽
建考棚新文武廟是科鄉舉得七人先後成進士蓋曠六
七十年所未有也歲旱徒步禱雨立應雖饑歲民不知荒邑
人建生祠禁之弗能止

萬希宗字可亭廷璧子乾隆己酉舉人授武陵知縣以廉能著
嘗過龍陽有民欲投水詰之云以囊金投旅館館人暗易以
錢懇諸官不得直希宗代訊館人杖梧乃朱書銀字於其手

置別所給曰字滅罪汝再訊其婦大呼銀字在否館人連聲
應云在在遂責婦曰爾夫自供矣婦果出銀案遂白歷任四
邑均有治聲子鼎洋自有傳

李振堃字承齋嘉慶庚申舉人授印江知縣平訟獄課農桑興
學校報最陞清江通判遷普安直隸同知兩督鉛運運丁無
敢擾民者分校鄉闈拔取多僑士解組後以翰墨自娛書得
顏歐法人咸寶之

萬鼎琛字璞軒嘉慶壬戌進士選庶吉士改曲江知縣俗剽悍
輕生地多官山聽民占葬常有將親骸貯瓦器中彼此盜埋
構訟不已琛廉得輕生者坐誣盜葬者坐罪風頓息調始興
移瓊山捕獲盜魁歐亞四及其黨數十名按以法保卓異以

勞卒於官

萬鼎欽字抑齋嘉慶丁卯舉人任監利教諭振興文教捐廉修
學宮時頻年水災悉心賑撫庠序中有被誣者必力雪之卒
後遺橐蕭然

汪極三字植齋少孤貧事母孝嘉慶己巳進士授正陽知縣俗
强悍盜賊出沒山谷開極三購擒其渠又新阜教匪倡亂設
法殲之調郟城除潔灣河漁舟稅疏濬鴻渠資助書院膏火
士民誦之

萬鼎洋號小岑希宗子事繼母孝待弟友愛嘉慶辛未進士授
曲陽知縣泊行稱最有富民忤其族族因訐其曖昧事富民
懼私獻三千金求庇時值修學宮臨訊置金案上曰某出此

多金助修學宮豈是不自愛人遂以金作捐款而洗其垢後
攝易州知州去任士人爭相餞一老儒貧獨後辭不獲曰公
不我飲某不齒矣洋笑從之

汪兆柯字則亭嘉慶辛未進士授廣東東安知縣地瀕海寇盜
充斥兆柯營海防翦窩戶居民安堵後粵垣苦旱適兆柯赴
省大雨如注上官喜謂曰東安雨也一時傳誦陞羅定州知
州引疾歸咸豐戊午重宴鹿鳴年九十一卒

曾鵬號南池嘉慶辛未進士授陸川知縣邑命案向多株連鵬
廉得其弊首犯外皆省釋有貢生某與陳姓爭刈禾某糾眾
鎗斃一人立寘之法民服其公

王鵠字霞坡如鑿子嘉慶丁丑進士任石泉知縣鋤姦弭盜民

懷其惠調米脂創書院課耕織政簡刑清以艱歸服闋入爲
兵馬司指揮值歲饑監視粥廠釐剔宿弊胥吏悉憚之任滿
選平鄉知縣移疾歸其家猶寒素也

胡美彥字俊民心安孫嘉慶己卯進士選庶吉士改戶部主事
遷刑部郎屢斷疑獄旋辦理通州倉場糧務向例官米兵米
合發弊叢生美彥請分給遂爲例授廣東高州知府護兵備
道會剿粵賊劉八半載疊著勞績卒於官子霖澍詳忠義

靖厚欽字阮南道光辛巳鄉試第一癸未成進士授平武知縣
卽古陰平郡羌夷雜處欽開誠布公民夷協和時有兵差擾
民繩之以法諸將領皆斂戢暇則詣龍門書院進生童講論
文史士風大振子郁恆辛卯舉人由東湖教諭陞漢陽府教

授所至培植士類布政使張建基欲以廉能薦辭不就

曾世儀字鴻階廷彩子少英敏有德器道光初元以副貢舉孝廉方正乙未成進士授昌黎知縣扶姦弊拯疾苦捐廉重修文廟及韓文公祠訪造處士齊慶懷墓廬旌以孝子黎俗大化邑舊有孟公祠亦前宰有德政者士民復奉儀祿位於內稱孟會祠旋調赴遼陽辦理團防大吏以居心仁厚事求實濟聞於

朝擢保定府同知去任時老幼攀留爲繪臥轍圖紀之尋署易州及天津河閒府事以疾卒於官生平篤於天倫以孝經能括羣經之要引證發揮梓以公世又喜表彰忠義如郡城之忠顯廟杜茶村祠皆率同人倡捐重修縣令關某回廣西原籍

多年因感知遇時以金寄贈武昌衛某臨終託妻子後資助數十年不替其重義輕財如此歷官數十年未嘗置家產以菜羹名軒祀直隸名宦祠詳畿輔通志名宦錄祀本邑鄉賢汪封渭號竹千道光癸未進士歷夏津邱縣諸城知縣陞東平知州調德州所至有惠政四充鄉闈同考官士來謁不受贄貧者飲助之聽訟反覆開導不輕加鞭笞諸城歲大祲捐廉給粥全活無算德州城西運河隄高於城每患潰決封渭更築子隄晝夜督催幾廢眠食德人至今賴之

汪士俊字秀民道光乙酉舉人任興化知縣嘗捐俸賑饑咸豐三年粵賊據揚州興化戒嚴士俊督民團練水軍倣宋張榮連漁船爲水寨法擇險堵禦賊不敢窺因勞成疾卒

黃州府志卷之二十一
洪恩瀚字崑泉道光乙酉副榜授石屏知州甫履任卽捐貲修學宮加城堞嗣詳請免賦役蠲苦丁復鹽市禁銅礦皆允施行士民爲立去思碑

李士燮字子烈母姜氏以苦節旌士燮道光己丑成進士授四會知縣有政聲大吏稔其才檄從征徭匪堵捕出力以受瘴成疾卒事

聞贈同知銜廕子入監

王自筠字竹泉父大玉郡增生品學爲里黨矜式自筠夙秉庭訓中道光辛卯舉人以大挑知縣簽分安徽歷署青陽銅陵縣篆倡建義倉捐俸課士卓著循聲咸豐壬子充江南鄉試同考官識拔多名士吳廷芬劉廷枚吳寶善其最著者弟

自箴從九品以軍功保府經縣丞留安徽補用署霍山知縣咸豐九年春賊犯境時箴兵不滿三百設伏堵剿破賊萬餘生擒賊目數十人事具平定粵匪紀略

史宇衡號望村道光甲午舉人大挑知縣籤掣四川因母疾不赴母卒服闋始補峩眉縣甫下車胥吏進陋規力卻之並除其名蠹猾竦息居官多惠政不以酷刑威民邑有史母之譽會猥夷滋事衡督兵堵禦年餘悉平士民於眉山祠祀之萬鼎勳字力堂承宗子由優貢生中道光乙未鄉試權五台知縣攝應州屢決疑獄所至有循聲每出不以輿從自隨只攜老僕二人民不知擾考最晉知州丁外艱歸卒

李應觀初名大坊字言齋道光己亥舉人任達縣知縣有藍李

二逆構亂大坊繕城修守備賊氣沮又有土豪張聯陞者武斷鄉曲嘗箠其從弟至死弟婦鳴官前令不敢究大坊執之陞黨糾聚將爲變大坊飛稟上官立寘於法其黨皆散

嚴由霖字南屏道光庚子舉於鄉任鄞縣知縣性慈惠愛民如子邑人士爭頌之時軍書旁午籌備軍需有功予以幹浙江通判殉難

王燕瓊號杏田道光庚子舉人以知縣籤發四川委辦西藏巴塘軍台因裏塘夷人不靖瓊親詣夷酋查祿娃營諭以大義查泣謝事平署會理知州平滇狷李寬等之亂敘功以知府用復署彭山縣裁陋規八百金有劇盜張萬年黨與連數境捕寘於法調劍州一洗從前積弊年滿民籲留不得爲建清

官亭旋題補石柱同知甫視事卽裁夫馬陋規千餘貫會土匪張浩然等聚眾燒香謀不軌瓊密飭鄉團捕獲之以勞疾卒於官民皆設位致祭著有銅豆山房樂府雜集若干卷

王家璧字孝鳳先世黃岡人祠墓戶族皆在自其祖念辰遷武昌縣遂寄籍焉家璧高才茂學道光丁酉拔貢生己亥順天舉人甲辰進士改兵部主事父子異爲豪右構陷戍雲南家璧年九歲牽衣請隨行子異呵止之乃矢志雪父冤讀書覓古人忠孝事歌哭不能自己鄉舉後行八千里併日而食省親成所以大母喪暫歸供職兵部時復乞假詣雲南隨侍三載雲貴總督賀長齡林則徐咸器重之咸豐元年

大赦子異格於例刑部侍郎曾國藩力請釋奏入

黃州府志 卷之二十一
報可家璧益感奮圖自效粵賊構亂隨營差遣諳悉戎機會國藩胡
林翼左宗棠先後疏薦擢大理寺少卿授順天府府丞旋調
奉天府府丞兼學政以事左遷光祿寺少卿居官論列時政
如固海防興水利懲機器和將帥散會匪黨與戢揀金徒眾
諸章奏海內傳誦御史吳可讀彈劾成祿被議家璧峻詞疏
救同官尤爲心誓至其保禦鄉邦變通牙帖軍需取給商不
病而

國課裕捐建西山懷忠祠祀死事諸臣邑賓興鉅款亂後乾沒白
疆吏規復漢回不靖主講關中胥化於善近畿歲大歉傾貲
助賑民無意外之變凡此皆其實心實事之可紀者單懋謙
有云孝鳳之行堅苦卓絕一出於誠蓋紀實也年七十卒著

有奏議雜文詩集若干卷

童範儼號桂丞道光甲辰舉人由軍功授安義知縣以廉能著
調臨川捐廉賑饑善政備舉督修邑志捐金爲倡撫軍嘉獎
並飭各州縣以臨川爲式東鄉民因糧滋事範儼奉委往撫
士民郊迎三十里其得民心如此陞吳城同知裁陋規殆盡
以乞養歸卒於家從孫燕林同治丁卯舉人歷署弋陽都昌
縣事亦有政聲

吳榮字又桓伉爽有俊才道光丁酉拔貢領本科鄉薦咸豐癸
丑成進士授刑部主事改湖南直隸州大吏稔其才甫至省
卽委權桂陽篆地鄰粵境賊猝至榮簡練鄉勇力戰卻之復
招集流亡培植土類桂俗訟獄判斷後必納官錢屏勿受政

聲翕然改權鹽衡州值衡永郴桂旱荒奉檄辦賑咸被實惠
旋署岳常澧道澧州大水榮棹小舟勘災省隄防撫老弱報
最有期以勞疾卒大吏咸惋惜之著有誦芬書屋詩文集
易用剛咸豐七年以武勇投大營自效時粵賊蔓延各省用剛
隨大軍克復安徽天長縣城九年解鎮江府圍同治二年克
復無錫金匱城生擒賊目三年又復宜興荆溪等縣城每戰
輒先登身受重傷累擢提督旋以勦除捻逆功

賞穿黃馬褂未幾卒

靳水縣

饒應元字善仙明崇禎庚午舉人順治中任溧水知縣天資長
厚而事有執持妖婦曹氏邪術惑民應元摘其姦申請誅之

編徭役立排丁法民無偏重偏輕之累

江南名宦志

程維伊字懷人順治丙戌舉人授慶元知縣建官署葺學宮民
鮮春糧授種導植食鹽聽民自買禁姦商運賣之弊丙子充
鄉試同考得士皆名雋平湖陸清獻公隴其爲尤著後致仕
歸著有積雪樓稿松源彙編

李生美字伯純弟果字伯徽順治丙戌同舉於鄉丁亥生美成
進士授德安知縣清操勁節饒有膽識草寇負嵎領民兵摧
破之以勞致疾卒果爲洪雅知縣處蹂躪之後辟土招亡修
城葺學亦卒於官祀鄉賢

官撫邦字綬之應震子順治歲貢生任大冶訓導學問該博詩
古文字卓然名家並善書法居恆常自撝謙其言訥訥不出至

於教育人材惟恐不盡成也披荆立學尤爲勞勩著有琦玕詩草子純仍異才早逝純滋詳儒林

何之旭字山夢順治辛卯拔貢授德化知縣值亂後寇燼屢然之旭禁暴戢姦邑有起色作聽事堂題曰不侮鰥寡不畏彊禦不生事以擾民不懷私而忘公德人遂呼爲四不堂著有白雲六編皆治德化上下文移因事制宜動見本末

南之傑字偉公有杞子順治丁酉拔貢生授利津縣丞署萊蕪知縣兵燹後邑多流亡之傑力請於上得除荒田三千七百餘頃蠲積逋二萬一千餘兩民困以甦改定海丞陞長山知縣邑漕糧數百石例輸德州去邑五百里費數倍之傑令民就買以兌民甚利之告歸長山人爲刻攀轅集子夢班貢生

任華亭縣十載有政聲晉淮安外河同知

聖祖南巡嘗以

御書賜之孫光發詳文苑

張邦福字嚮五父問德嘗兩佐劇邑狷介有聲卒祀鄉賢邦福順治戊戌進士任紹興推官精明練達摘發如神訟牒悉置內署句訊之下情僞立剖吏不能爲姦去紹之日民爲立郭山書院郭山其別號也後歷官五城兵馬司乞歸子萬選舉人有文才

浙江名宦志

王保釐字東郊順治戊戌進士温厚和平與物無忤任通江知縣修城垣建學宮爲政平恕不尙苛刻後陞常州府通判李成棟字雲浦順治己亥進士授樂昌知縣留心民瘼懲姦宄

恤窮困置義倉建書院善政纍纍遷雅州知州尋告歸卒祀

鄉賢

案通志廣東志俱作李棟誤

徐五宗字子九三餘孫康熙十六年由廩貢生授彝陵訓導署興山縣篆值吳逆未靖招撫流亡早有政聲厯石首教諭捐俸葺學宮課生徒多所成就子源舒作枚自有傳源遠舉人肅甯知縣有循良稱

畢友宜字見次少有至性父沒後每試藝必焚香告墓所康熙己未成進士授建甯知縣除積弊杜請謁同考闈闈得士稱盛以疾告歸杜門訓子當事罕識其面卒祀鄉賢

劉同向字校五康熙辛酉舉人任新化教諭捐葺學宮訓飭多士以窮經力行爲務秩滿陞永州教授諸邑弟子列郡庠而

遠未至者歲試之期悉召至而飲食教誨之後沒於官新化永州俱祀名宦本邑祀鄉賢

徐廣淵字伯志康熙戊辰進士授廣宗知縣卽古沙邱地南近漳水隄忽決城不沒者三版萬戶震動廣淵痛哭籲天願以身塞洪波陡平丈餘水退卽日加築躬率畚鍤延袤數十里居民安堵名曰徐公隄邑多陋規歲耗民財三千餘金廣淵悉爲革除民懷其惠

徐源舒字崑淳五宗長子康熙壬午舉人授零陵教諭零附郡有重鎮弁兵每與庠士忤籍有徭生儻俟無知亦不靖源舒諭士子以禮自守召行伍與之約誠勿再擾於是弁丁斂跡命徭生習威儀言辭請學政於試卷面註明徭籍分別考試

捐俸修葺學宮程課士子又時周恤寒士鬻序大振乞疾歸
當道禮賓鄉飲三次年八十一卒

周節周字成菴壽明孫榜姓楊康熙乙酉舉人任道州學正振
興庠序整飭士風學署有敬一亭嘗於暑月置臥榻其下有
貧生爲族豪誣以盜葬祖塋州牧委勘豪進金求免節周叱
曰此何地敢二心以服官乎詰旦往曲直立判回署而亭摧
榻已齏粉乃喟然曰向若不畏四知當與是榻同盡矣子象
晉舉人東湖教諭有學行

徐作枚字民樞五宗子康熙戊子舉人總河陳鵬年奏請各省
候選人員曉暢河務願效力者赴工作枚捧檄赴袁浦次年
署北河同知南北河督交疏保授兗州府黃河同知引

見奏對河務甚悉

恩賚御書墨刻貂皮諸珍到任估計工程不浮不刻各汛堡置小鐘
夫給絮衣水發則鳴鐘集救隄少滲先以絮衣塞之是年秋
戴家樓水發雷雨交作隄幾潰作枚疾呼曰我等守土無可
去之義如不獲願以身塞眾感奮力救獲免後以同僚不相
能遂解組歸

徐本僊字佑倫梁子康熙庚子舉人考授中書雍正時棟發雲
南總督鄂爾泰深器之檄權昆陽知州郡有滇池周三三百餘
里山溪五道旁入沙淤每淹民田有建言會五爲一俾流急
以刷沙者大吏矐之本僊謂以一河總五倍之水岸衝沙積
勢必橫決爲害益巨再三指陳大吏悟乃止補文山知縣捐

建書院培植士類時以報壘爲功本僊獨條陳利弊文山遂無加賦累委審烏蒙東川重案平反數百人陞雲龍知州革井竈陋規捐軍需馬匹代完民間無著浮糧代民繳運米夫價民慶更生大吏以知府保題丁內艱歸服闋赴部兵部侍郎王士俊以博學鴻詞舉

召試內閣仍以雲龍州任內保題授永昌知府條減公件歲免千餘金所轄土司如猛卯抄擄孟定開廠孟連承襲諸大案本僊深謀獨任定難倉卒邊地以安尋晉雲南糧道五年解組歸築室石雲吟詠自適工擘窠書人爭寶之著有曲辰堂詩集卒年七十有七子立崧自有傳立蘇詳文苑參通志及先賢學行略案本僊權昆陽知州時前政臧某意其弗習於錢穀也約

一夕面交代毋以吏胥及幕客與聞本僊一一綜覈之畫諾而退覆案僅失計十數金耳人服其明達通志

冷文瑞字錫五本姓瞿父凝端居近糧倉祁陽冷成鶴在縣幕司倉廩出納夜夢黑虎繞倉楹聞晨往見文瑞在焉因丐爲己子教之學後註柳州籍入營伍起千總歷狼山鎮標都司前後遣丁迎冷及本生父至署孝養備至洊擢鎮遠總兵整飭撫綏兵民德之尋權古州鎮篆時瘴疫流行文瑞親診視捐藥資多所全活旋以染疫卒聞者多爲流涕長子逢泰以州判署隆安知縣歸里次子逢春仍居祁陽嗣冷姓

徐立御字從六本仁子雍正甲辰進士初任新鄉知縣有殺人於道者未獲立御禱而往驗屍忽起坐曰殺人者某也語畢

旋仆觀者大駭立拘其人一訊卽服調滑縣有僧被殺獄未決株連者眾立御稔其俗多黠少飲博負則爲盜乃密諭幹役給羣黠以博盡繫之羣方譁辯一人獨股慄願受笞立御叱曰博小罪耳汝奈何殺人慄益甚遂夜收於內署厥明合幹役趨其家曰某已供實有刀與僧衣亟持出其家驚怖付之案遂決陞光州知州補黎平知府修城開江興學建廟躬先勞役署鎮遠篆減水榷舡租商旅稱便晉貴東兵備道時苗疆新闢立御布威信設方略躬歷窮巖深箐歲無安軫遂致瘴疾卒於官

徐立正字丹懷雍正甲辰武進士官成都守備護參將時瞻對用兵軍需甚急正咄嗟立辦提督武深器重焉旋護泰甯副將詳請夷人入流者子弟應試以彰教化未幾署阜和遊擊提督岳奏頒行各部種印信委牌飭正齎赴阿旺勞丁之長女桑結住瑪歸時酬以良馬金帛一無所取尋署建昌中營遊擊一日甯遠失火延燒甚熾正請用以火攻火法排烏鎗數百對放火應鎗而息擢桂林營參將將抵粵疾作遂致仕王國英字紫儲生八歲而孤事母氏友諸兄庭無閒言讀書不屑屑治章句而能以書法世其家爲諸生立身行己不肯後於古人雍正五年舉賢良方正

召對稱旨授宛平知縣宛平爲京府首邑向承辦海子羊草燥溼不時輒賠補民受其累國英請於當事得幣除又捐廉代償逋賦二千四百兩有奇畿甸之民皆相慶怡賢親王深器重之

十三年

特簡南雄府知府

賜御書墨刻紫金錠香珠貂皮等項到郡大吏皆稱其為王宛平也

尋擢兩廣鹽運使以疾致仕

參通志

潘成玉字德璋幼隨祖遠出乾隆中緬匪倡逆以貴州行伍從軍進剿所向有功由營千總擢古州營守備又隨征大小金川羅博瓦括爾崖之戰成玉功居多將軍豐陷賊陣不得出成玉單騎救之又乘閒襲虜巢大軍隨至遂平其地擢都司晉廣東右營遊擊會海盜梁亞香等糾黨數千人焚劫商賈成玉率部屬殲擒之而赦其為從者粵人戴如父母官至廣東中營參將

范思皇字西懷璿孫乾隆辛未進士選庶吉士改吏部勤慎供職丙子典試福建拔錄多知名士尋督福建學丁父艱起復補江西道御史旋以原品休致優游林下嘗有句云

帝遣閒身歸畝天留老眼看兒孫其循分自得如此卒年七十四

子世業自有傳

程應麟字耀東才識邁眾事祖母蔡母李以孝稱乾隆癸酉舉人以大挑知縣分發直隸時

上幸木蘭應麟奉檄至密雲潮河見上流浮漚謂從人曰連日陰霾浮漚者水汎也可速渡甫登北岸而浮橋官渡盡漂去諸辦差者皆為水阻應麟獨無誤黃河水決需秫稻急應麟奉委任邱買辦二十五萬增其值不數日報竣委審疑獄多所平

反又委賑景州饑親核村民禁絕侵蝕後以勞瘁卒
葉際昌字占祿蚤失怙事母孝性豪爽好客岡邑名士王一翥
沒葬巴河鳳山年久就堙爲之倡修立碑由乾隆癸酉舉人
選均州學正訓迪有方尤培養士氣但用財疏後官歸後其
家益貧沒之日竟無以殮

范世業字素夫思皇子性伉爽練習時務乾隆丁酉拔貢生充
四庫館膳錄由議敘州同累官陝西孝義同知嘉慶初教匪訖楚
境寢及秦中大吏議守禦世業指陳要害擯不用已而賊果
從漫川關入一如其言大吏內悔復使世業往探見積尸滿
野撫膺痛哭乃怒馬而返直至廳事前下馬排闥入抱大吏
足具述生靈橫死狀聲隨淚下中雜憤言語纏纏不可止左

右皆失色大吏掖之起亦不之責也尋有訛傳賊犯某縣者
大吏既心器世業使督兵堵禦至則化離數千人皆難民也
呼而撫慰之臨去難民扣馬曰官舍我去吾屬無生理矣皆
痛哭世業亦哭會大雨與難民露立林中竟一日夜旣霽始
散去難民獲全而世業以是得寒疾不數月卒大吏率其屬
厚賻之

參通志

徐立崧字松之本僊子由附貢生援例分發福建初署連城知
縣創建試院嗣任歸化構訟者以暮夜金求袒卻之仍直其
事調松溪時學宮頽廢倡義新建並置學田三百石勒碑紀
之

陳光詔字金門乾隆己亥舉人大挑知縣分發湖南歷任長沙

黃州府志卷之二十一
湘陰永定平江辰州等州縣陞武岡知州任平江時有教匪
滋事詔擒渠魁數人大僚欲誌後患諭呈黨冊詔密焚之餘
黨卒爲良民他如創建書院均平賦稅所至皆有政迹致仕
歸年八十卒子二沆湮俱詳文苑孫廷經自有傳

潘紹觀號巽山紹經弟由舉人官中書軍機處行走乾隆辛丑
成進士選庶吉士改刑部主事晉郎中總辦秋審請減情輕
法重免死案二件改緩改矜定新例數條京察一等出知韶
州府安南咨送海盜三十七名惟案誅一情實者餘皆全活
之英德饑民劫奪官米上憲將發兵駢誅紹觀親往勸諭眾
立散嘗伴送暹羅貢使入都事竣回任尋擢浙江甯紹台道
未上卒著有巽山詩集

華豐貞字年占少爲諸生家貧甚從藩吏習簿書大憲閱所辦
稿奇之贈以資勉就學乾隆乙卯成進士授三臺知縣有大
姓以壻貧悔婚謀娶者亦豪族兩家俱重賂求祖並受之給
攜女出質惟所願往臨訊取兩家金給貧壻當堂斷領完娶
觀者如堵皆頌廉明後以年老改教職告歸卒年八十八

徐陳謨字迪臬嘉慶辛酉進士授四川東鄉知縣時文獻散佚
邑乘闕如謨蒐輯成書捐廉付梓重修黌舍城垣衙署倉廩
百廢具舉提督羅思舉未遇時以非罪繫獄謨奇其才言於
大吏力出之不十年羅乘際會立功名深感其德會謨量移
要地鄉民籲羅乞代留者數千人羅以聞於大吏獲留任後
陞眉州知州卒於官

黃州府志卷之二十一
蔡紹江字曉沙嘉慶己卯進士授戶部主事改刑部晉員外郎
充則例館纂修官部曹廿年勤謹端慤守正不阿名重都下
教人務崇實黜華門下士如大學士賈禎葉名琛其最著者
晚年益屏辭章專研程朱之學卒祀鄉賢著有周易補說宋
名臣言行錄補編詠左詩箴漕運河道圖考詩文集六十卷
胡璧華號崑白道光辛巳舉人任咸甯教諭襄辦崇陽逆匪有
功論陞知縣撰有平崇紀略知府金雲門爲勒石黃鶴樓歷
官直隸昌黎等縣攝順德府同知皆有惠政乞養母歸承歡
備至年八十重游泮水主講蕪陽書院造就多知名士著有
求可齋詩文集

蔡紹洛字蓮橋道光壬午進士歷任棲霞陽穀等縣知縣斷獄
如神吏民畏服尋遷吏部員外郎咸豐初擢御史多所建白
出知天津府值賊擾後緝撫兼行恩威並濟大吏上其勞以
道員卽補卒於官著有帝鑑圖詩

蔡紹沅字潤圃爲渾源州巡檢甚著循聲有某姓案經前任詳
辦已議抵沅力白其冤旋獲真犯越數年解餉過大同車覆
折足延醫治數日卽痊詢醫里居卽向被誣獲釋人也大驚
喜率妻子拜送於道後陞縣丞以母憂歸

程度字謹侯道光己丑進士授朝城知縣嚴懲蠹役之擾民者
除濫派徭役邑有程青天之名又捐俸倡建書院飲助士子
膏火自是掇科第者甚眾後以病解組歸

楊兆晉字海樓道光己丑進士授博白知縣博案山積抵任而

月舊牘胥清有同室相爭重賂求祖者晉拒之動以至性訟立解歲旱且蝗禱於城隍神應若響調上林地廣而荒請緩征民賴以活年餘卒於官民哭之如失慈父母焉

郭用賓字孟寅道光壬辰進士選庶吉士改刑部陞郎中每讞囚五聽並用析入毫芒舞文吏無敢文致人罪者出爲河間知府尋調山西蒲州值歲旱捐俸設義倉施飭粥全活甚眾洊擢冀甯道歷署按察使有富豪因姦仇殺餌以重金立卻之寅諸法咸豐三年粵匪北竄巡撫哈芬委令專辦晉省軍務統兵出守太行賊不敢犯旋以賊由陽城繞據高唐獲譴柳先庚號西圃道光壬辰舉人選蒲圻教諭咸豐二年粵匪犯楚歎曰疾風知勁草今正其時安有偷生苟活而可齒於人

類者乎佐設守禦計會大兵追賊下竄委權邑事賑撫悉當境內獲安嗣艱歸著有西圃詩文若干卷

畢至字春亭道光乙未進士歷工部郎中出爲漢中知府有善政後府屬甯羌州歲饑官民不協勢幾變時至隨總督舒辦理安徽營務已二年巡撫王奏調仍回漢中至單騎臨屬民喜躍相謂曰生佛還矣羌地遂平定子衍燠諸生任安縣知縣亦有政聲歲祲施粥活數十萬人卒後民祠祀之

徐儒模字西泉道光丁酉舉人授夾江知縣甫下車結積案百餘起計除凶棍某闔邑以冰心旭日頌之夾邑僻處士少師承肄業亦無專所倡建雲吟書院捐俸仗助膏火文教大興後崇祀名宦

郭時郁號梅溪道光己亥舉人大挑教職在籍督鄉團巡撫胡林翼錄其功洊保知州選雲南安甯州適徇匪滋擾郁勦撫兼施境內安堵旋移提舉黑鹽井修營宮建書院編排石橋運鹽者稱便後調永北廳永北向無學田撥稅課充之又以逆徇產業作賓興罰鍰租課向屬官收郁勒碑入公廩不悅服乾隆時有李某官是土多善政士民建祠祀之至是立郁長生位於其中顏曰李郭二公祠

陳廷經號小舫沆子少從學於邵陽魏源明經世大略道光甲辰成進士選庶吉士授編修尋官御史鯁直不避權貴咸豐初巡視中南北三城兼辦團防擢給事中所陳奏如請籌入旗生計請覈各省釐捐偏省巡撫當兼轄武營遣散勇丁必

編歸行伍立功戰將毋授文官中國習洋人長技以制敵邊帥仿充國屯田以備邊其隨事納忠如此廷經既以身許

國凡有彈劾無所回撓

朝廷亦嘉其直王中丞榕吉贈詩云同朝爭識超宗面

天子深知汲黯忠蓋紀實也官至內閣侍讀學士年七十四致仕前一日猶備陳邊防事宜洋洋數千言大旨謂邊省各辦團練卽制外夷之法居數月卒於京師所爲詩文不墜家風晚留心理學得考亭靜坐法其汲引後進孳孳如不及著有奏疏詩文若干卷弟廷柱優廩生有儒行蚤卒子慶長自有傳高士濂原名朗號玉山幼純篤家貧力學道光甲辰進士歷刑吏二部郎中旋授陝西道監察御史風骨巖峻朝野憚之歷

充秋審查倉監試諸差措置不苟嗣因母疾乞休居保定親侍藥餌四十餘日無少懈母沒哀毀骨立遂以疾卒著有養拙堂詩鈔

蔡興槐字植三道光己酉舉人由中書擢直隸州揀發貴州攝歸化廳理苗通判值賊退集流亡繕城堡請免民半租以蘇窮黎境多苗洞素與漢民構釁槐剖示利害皆誓伏手書定界碑置其境尋任貴筑知縣會外國主教胡縛理與黔撫爲難幾成巨禍槐單騎詣胡所諭以信義事得解大府上其績擢知府權知銅仁擒斬踞賊包茅仙伍雲昭於山洞闔郡肅清敘功以道員留黔補用歷任黎平鎮遠兩府均有政聲值寇亂移守貴陽賊薄城下境內裹糧避難者麇至大吏將塞

圍以守槐曰糧不入必無城民無依必附賊啓門納之賊不知所爲遂宵遁旋丁父憂歸請終母養主講本郡邑書院數年卒於家

陳慶長字子奉廷經子道光己酉拔貢生

朝考一等以知縣分發江蘇歷署昭文華亭青浦縣事尋補元和皆著循聲游升知府辦理水師營務釐局糧臺利興弊革金陵克復糧臺餘米萬石慶長悉以分給軍民清潔之操一如其父累官淮揚河務兵備道弟恩嘉字子政咸豐戊午舉人官兵部員外郎同治時新設通商衙門上憲欲爲保送辭不就後改江西補用道便道省墓卒於家

范忠集字靜軒咸豐辛亥舉人初任閩鄉知縣值兵災後諸事

需理渠修葺書院清釐案牘卓有成績馬營勇潰掠及桃林渠內慎守備外設偵探獲其魁送營正法民得安堵調補陳留卒於官

方鳴皋字鶴亭咸豐庚申進士授壽張知縣旋調署武城兼理臨清直隸州凡所蒞任興利除弊頌聲如出一口年老致仕囊無餘資掌教蕪陽書院年八十三卒

楊宗震字仿西性忠直以布衣傾家練勇助官軍勦賊咸豐七年總督官文檄委輸餉募兵十年隨營至甘肅以出力保府經歷受知於將軍金順辦理營務箋奏擘畫多出震手攻克甯夏王家疃及肅州等處累有功大軍出關震籌備糧餉贊助軍謀不遺餘力關隴肅清以道員留蜀儘先題奏加按察

使銜光緒二年丁父憂歸卒於家

麻城縣

董璋字公朗厚重有容明崇禎壬午舉人順治時官長垣知縣興利除害政尚寬大卒祀鄉賢子時升順治己亥進士官夏津知縣亦有政聲

項始震順治丁亥進士授縉雲知縣時山寇縱橫鄉邑殘破始

震招撫之民間婦孺散失者捐金贖歸後陞大理同知

浙江名宦志

王有容字自牧順治時任龍巖知縣時方軍興徵夫取餉羽書旁午有容多方調劑民以不擾暇則增城浚濠儲糧置械及漳郡失守賊來逼城有容乞師於贛與民瀝血死守調兵據

黃州府志 卷之二十一
勝屢挫其鋒賊解去

程浩字天行父自勝明靜海典史清介有惠政浩順治辛卯拔貢生授河南按察司經歷巡撫賈漢復聞其清操委署臨潁知縣轉台州同知時海寇鄭成功出沒無常浩日與知府郭曰燧等協理軍務有勞績告病歸行李蕭然時同年友羅載惇官黃州知府卒家口不能遠歸浩醵金資其旋里有古人風

胡躍龍字羣吉公國子順治壬辰進士任鄖陽教授捐建學宮值西山遺孽跳梁大兵進勦委給糧行閒士無譁者連攝鄖竹房三縣篆武當香稅典司者舊有例躍龍兩委監不受一錢巡按御史李稔其治行列首刻遷直隸新城知縣旋致仕

歸修橋施藥設塾賑饑鄰里頌之孫鉉詳文苑

鄒宗彥字坦齋順治戊戌進士庚子同考北闈所拔皆知名士旋授綏陽知縣愛民如子政暇以春秋課士聯科獲雋者二十餘人秩滿擢澤州知州未上病卒綏陽人德之祀名宦祠

汪淑問字邁陶順治己亥進士授隄爲知縣安輯流亡隄人德之

案淑問直隸灤州籍見國朝題名碑錄

王元士字大周順治己亥進士任定海知縣以海防禦賊功陞瓊州知府除負鹽陋規訪求明邱濬海瑞後裔拔取之士民稱頌不衰

鄒世美康熙歲貢生好作詩尤長於集古晚任沅江訓導捐修學宮與同學謝某置學田四十石兩院保舉署沅江知縣頗

著名迹

王楠號頤中康熙丁卯舉人授武陵教諭詳陳興革十要葺文廟修隄塍以大計擢羅源知縣善政尤著調署閩縣有把總被誣侵蝕馬價擬斬楠理其冤將軍不憚楠曰職在核實縱姦廢法故殺負心官可去勘不可更也後有巨盜薛彥文橫肆人心震驚楠察知城東有姦宄爲內應者密示捕員於二更時擒斬之次早同營將入山搜獲賊首餘黨悉平巡撫黃國材特疏保薦因老病乞休士民感德鐫碑頌之

鄒士璉字石瞻康熙戊辰進士由檢討典試山東尋督山西學條約悉關大體累擢內閣學士壬辰充

殿試讀卷官旋奉

命祭告東嶽監賞綠旗兵丁越三年乞休出入禁闈垂三十年小心

謹慎及解組名公祖餞贈以詩歌宦成之美擬二疏焉歸以餘資建祖祠置田以供祀事清閒淡泊足跡不出戶庭卒祀鄉賢子汝模己丑翰林能繼父業

鄒汝魯字鈍齋康熙辛未進士初爲清豐知縣革錢糧宿弊民甚便之再任獲嘉邑西有來雲寺界與延津縣接居民置地二十四畝爲香積資明末寺廢地失墾後構訟不息汝魯剖折之俾各得一十二畝兩邑均帖服行取御史轉大理丞時有家人以事誣其幼主者獄上汝魯託疾未署押因得緩獄大吏隨雪其冤有知縣杖姦民斃仇家夜竊其尸懸周姓門縣役與周有隙誣周重獄申部汝魯駁之得白擢僉都御史

大振風紀蒙

賜石硯詩文外任奉天府尹終太常寺卿著有鈍齋詩文稿

魯之裕字亮儕父重光累官雲南永順鎮總兵有異政父卒之裕寄籍太湖年五十五中康熙庚子江南鄉試由內閣中書出知河南確山永甯二縣尋授贛州知府陞湖北下荆南道移直隸清河道署布政使之裕氣概豪邁所至侃侃自將不隨上官俯仰初田文鏡督河道駐河南之裕抵省值中牟令以事忤文鏡命之裕往摘印即受事中牟之裕入其境聞士民嘖嘖稱令賢惜其去遽反叩轅門力白中牟令能得民宜留任文鏡賞異之如所請官荆南時免太和山香稅三千餘兩請蠲沔陽州積荒地丁缺額銀七萬餘兩創設安襄鄖三

郡書院修復諸葛武侯隆中草廬羊杜峴山祠及陽春白雪臺諸古蹟在清河濬通畿南河道七百餘所以老病致仕歸生平所著詩古文及纂輯經史源流諸書共二百餘卷卒年八十有一

案之裕之學無所不窺尤精水利所著式馨堂文集多見採於 皇朝經世文編嘗撰下荆南道志詳核典雅稱善本邑南望花山魯姓是其族人後裔今寄籍江夏縣

參縣志

鄒汝謙字謙公由貢生選授岳陽知縣潔己愛民修學宮培書院文風大變岳俗輕生多株連無辜謙嚴禁之同宗無服輒聯婚謙諭以百世不通之義違者立杖斷離風俗以正再攝

靈石潞城人咸戴德乞休歸里布裳徒步晏如也

鮑啓泌字師鄴雍正丙午副榜任湖南石門知縣邑多虎患泌至輒遁去調任通道除採買轉長沙通判承修貢院捐銀四千餘兩號舍一新署衡州知府適通道煤窰嘯聚大吏因泌前任時有惠政委查驗即單騎往曉以大義責懲首犯數人餘悉省釋苗民帖然

甘學涓字石泉乾隆壬戌進士授興安知縣政簡刑清造岑陽書院延師教育文風丕振邑有僧犯姦餽重金不受有誣富民私宰耕牛者為之辨釋後餽酒內藏百金召其人笑還之尋解組歸士民流涕餞送著有簡齋文稿

吳家駒號栖堂乾隆甲戌進士授確山知縣邑當孔道舊苦供

給家駒除勘合外無所與民賴以安聽訟多平反有吳青天之號信陽富民杜姓因姦殺人投刀而逸州弗能決上憲以委家駒家駒廉知死者為杜舊佃遠令決莊前塘水落而刀見徑拘杜以刀入傷處適合遂伏罪四充鄉試同考官所拔皆名宿

鮑棟字宇週廩貢生署印江知縣有廖戴吳三族爭田訟數十年不決棟往勘無所可否置酒勞之三族皆幡然悔願以爭界為閒壤轉仁懷同知詳請廣學額三名文風蔚起歲饑捐廉設廠施粥饑民大蘇以卓異入都卒

鄭文坦由附監援例授通判初攝廣元知縣捐建義學置學田繼任彭水邑屬通衢役夫工食素為吏蝕乃捐銀給夫勒碑

以杜其弊復判縣州有蕭姓先與貧生婚後悔之坦捐俸三百金為生置田宅斷蕭女歸生生以力學成名

侯映甲字麗山乾隆庚辰舉人初授祁門知縣明決果斷而操守廉潔屏除一切陋規丁母艱歸服闋選高臺卒於任子幼扶襯歸里家徒四壁無朝暮資未幾亦卒無繼嗣者廉吏無後人咸惜之

胡翔靄字喬雲鉉子乾隆乙酉舉人任杭州通判遇事勤敏委辦兜盤頭海塘眾議撤舊柴塘翔靄不可外仍柴塘內加石塘工始就杭郡多火災羣不逞輩因火搶奪翔靄禁救火兵丁及諸無賴不得藉事作姦違者按律坐境內肅然歷署九郡所在有聲著有武林遊草四卷

梁景陽字鳳階號梧岡乾隆庚辰鄉試第一己丑成進士歷官吏部郎以勤慎聞轉監察御史累擢太僕少卿所陳奏多削草其請彌封硃卷以杜關節一疏得

旨施行纂入科場條例人始知出於景陽云景陽為人廉介明敏待人篤摯有同年友卒於京無子遺女三流離失所景陽為嫁其長女而攜次幼者返里各為婚於名家縣有會館在京被侵越景陽贖歸新葺里中好義者咸助之

參通志程德楷字憲甫號松亭嘉慶乙丑進士由編修典福建鄉試尋視學貴州時黔省教匪煽亂奉

旨撰刻訓民七說分發府縣訓士四論曉諭諸生大學士曹振鏞以家學淵源人品端正薦入直上書房授惠親王讀攝授

皇長子讀旋視學江西以光祿寺卿卒於京惠親王親臨奠
醊奉

旨予葬弟德模字端甫以廩貢任大冶訓導從弟德懋字禧甫以副
貢任咸甯教諭俱能振興文教培植人才士林至今稱頌

梅茂南號庾村嘉慶辛未進士歷任鹿邑東安等縣知縣以廉
明著宰鹿邑時河決捐鉅資以捍患人咸賴之爲河南同考
首薦周文勤公祖培期以偉器後果爲賢相

陳五典字慎齋嘉慶丙子舉人大挑知縣分發陝西歷署葭州
及平利臨潼等縣實授麟遊所至多惠政有年家子某督陝
甘學政以典缺清苦欲謀於院司遷之典力戒勿言某出告
人曰陳公清風亮節真令人相對赧顏也

毛正坦字循齋由監生援例任句容寶山等縣知縣政聲卓著
巨盜宋久和積案未獲坦率役擒之築海塘隄岸民皆利賴
至今呼爲毛公隄後擢太湖廳同知乞疾歸

羅文樞字北一道光己亥舉人任龍安潼川等府知府遇事立
斷積牘一空時髮賊藍姓最悍屢擾蜀稔樞惠政且憚其團
防不敢犯境著有愚溪文集綱鑑輯要等書

袁學濬號蓮渠少從學於季父銑有文名道光庚子舉人咸豐
閒練勇出境剿賊保知縣歷署泰和萬安縣初赴泰和值隆
冬夾道兩山爲賊踞濬夜帶二十餘人火而入賊不敢動旋
率眾攻城濬先士卒登陴固守經兩月城賴以全調補萍鄉
未上卒

程鵬字九希幼穎異爲黃安名宿劉秉琳高足弟子咸豐己未
舉人由教習揀發福建厯署霞浦閩縣南安等縣知縣到省
時有黃葉兩姓自乾隆閒爭墳構訟互叩閹久未結鵬奉檄
往訊立判決咸稱神明霞浦故多曠地募民墾數千畝有奇
鹽稅叢弊鵬請官運定價弊立除在閩縣擒逆首楊虎清保
升同知南安任內徵銀減價立碑民咸頌德兩充鄉闈同考
得士最盛鄭啓植張端陳懋侯輩皆出其門

黃安縣

江載清字子厚明崇禎己卯舉人順治時爲分宜知縣甫下車
問民疾苦除煩苛革虛冒如報減浮糧其大較也卒於官貧
無以斂撫軍助其喪乃得扶櫬歸泣送者數千人崇祀名宦

祠

耿應衡字玉齊由廩生舉賢良方正授遵化推官累官鄜州兵
備道甯紹台副使熟知利弊凡所因革悉協時宜先是安邑
賦役雖有條鞭之法而里甲不清胥役飛詭應衡爲倡畫一
之議至今公私稱便卒祀鄉賢子宗墳字箴伯以歲貢生官
上虞知縣亦有政聲

韓張梗字因孺順治歲貢生任應城訓導遷漢陽教授訓士有
方擢阜城知縣創立義學延師課士興利除弊訟獄衰息阜
民德之建祠於學宮側奉祀不衰

盧繩慈字昭許爾愔子順治戊子拔貢生授松陽知縣力鋤豪
強善決疑獄時海氛初靖軍需供給一切不以勞民卒於任

生平與張希良之父百程爲死生交臨沒執百程手以未及
迎養老母爲憾啓其笥只薄俸數金松人哀其廉斂金以殯

祀名宦祠

松陽名宦志

彭繩祖字若昭順治戊子拔貢生除泉州通判時大軍集廈門
轉輸芻糧無缺攝泉永春晉江三邑篆復攝博羅額免丁徭
羅人建祠以祀長甯山寇猖獗指畫方略渠魁授首督撫交
章題敘擢石阡知府移兗州脫辟囚百餘人時東省地震旋
患澇陳救災十策大吏據實入告

救下其議通行六郡蒞兗五載兩攝道篆清名惠政東魯至今頌之
孫之夔詳隱逸

鍾琇號青巖順治壬辰進士除袁州推官多決疑獄有良家子

爲賊所脇琇爲申釋有誣鄰盜牛者琇以牛誤入爲解袁介
楚粵山谷之間流亡結聚謀不軌大吏議用兵琇諭降之尋
擢戶部郎中典江西鄉試後出知漢中府一意與民休息省
徭役闢荒蕪卒以耿介忤上官罷歸著有心遠堂集

吳之珍字貞吉士伸子幼好擊劍及長折節讀書順治壬辰成
進士授諸城知縣邑近海舊設防衛芻蕘糧供億不貲珍
力請報罷他如核逃亡勸開墾革兩稅羨耗禁緝捕株連諸
惠政甚多旋以親老致仕子宏初詳文苑

程之澍號傅巖順治甲午舉人任郴州學正值喪亂後士鮮嚮
學澍親爲啓迪程課綦嚴一時人文蔚起應江西同考聘稱
得人庠士某以掘地受礦誣禍幾不測澍力白於上憲乃免

未幾卒於官柳士立祠祀之

盧經字叔向爾悌子順治丁酉與弟縱同舉於鄉戊戌成進士授興化推官時海賊入寇閩憲檄附海五十里者限三日遷內地經請寬其期民始得從容遷徙蒞任一載平反疑獄活死囚二十有三人著有長安秋興稿

孟應瑄字禮乾生而蚤慧有神童之目順治庚子拔貢生考授教習選瀏陽教諭課士勸學文風蔚起遷德安教授擢東光知縣興利除害人稱神君子之春 恩貢生荆門州學正喜排難解紛多義舉

盧絳字苻浦爾悌子康熙壬子舉人署監利教諭修葺學宮改孝感課士多所成就擢絳縣知縣常俸外不名一錢歷任十

七年勸導切至訟獄衰息橫嶺關多虎患絳爲文告神刻期徙去陞都察院經歷以疾告歸絳以經術爲吏治故所至有聲著有春秋闡微行世子瀆附貢生居憂廬墓六年

秦人藩字巨屏雍正乙卯舉人任龍山知縣修學宮築隄防興水利調繁苗疆尤以化俗愛民爲急案有株連者反覆申理不惜捐俸以生之解組歸主講書院多所造就

張炳鯤字南池乾隆辛酉拔貢生以教習用知縣分發陝西歷任十餘城多善政如折富室孟賈等連年大獄革民間產子報官之累讞三水獄釋枉繫三百人攝葭州代貧民完逋糧官涇陽時治提兵私牧之害任扶風卻里長之供給在寶雞革里馬之苛派終宰郃陽上辦賑條陳糾剔採買舊規諸議

識者躋之邵民爲立祠與明名宦葉夢熊並祀焉子忠坦詳文苑孫錫謙自有傳

吳汧字雉山宏初孫乾隆丁卯舉鄉試第一壬申成進士歷任范縣陵縣德平知縣皆有政績兩次恭逢

聖駕南巡辦公勤慎蒙

恩賞緞加級任內勘辦水災二次蝗災三次賑卹得宜乙酉戊子兩校棘闈所拔皆名宿卒時宦橐蕭然請領貧員路費始歸葬子大榘字櫟園工書法尤好行其德

吳中理字淑黃文煒子乾隆丙子舉人授保康教諭修黌宮建齋舍廣庇寒士擢浮山知縣縣久無科第因買學宮前民房撤去之科名遂盛民有貧鬻妻女者捐金贖還子性誠彰化

知縣亦有政聲終淡水海防同知

吳大杙字孟仁乾隆庚寅舉人補應山訓導新學宮表節孝士之貧者資以膏火嘉慶初教匪竄縣境與邑令修城垣設守禦賊逼城率眾登陴衣不解帶者二十七晝夜尋截取知縣未赴部卒弟大祝舉人性肫摯有義行

張錫謙字乙舟忠坦子嘉慶乙丑進士選庶吉士改官戶部游授辰州府知府調長沙清結積案數百起時稱神明長沙知縣某辱責生員復以爭市試卷事遽收生童二十人眾聚鬪勢張甚錫謙馳往開導並諭釋被收二十人逾日皆詣府自投無一逃者當道欲興大獄賴謙力爭始從輕典會猺匪趙金龍倡亂調署永州清保甲督團練危城獲安累軍功以道

員卽選引疾歸卒孫相字字芝卿雋才茂學少有名稱同治
癸亥入翰林卒年僅三十餘

秦光辰字洛臣學泗孫嘉慶戊辰進士授完縣知縣升滄州知
州治行爲燕中最洎去滄民攀留載道嗣任遷安武清滿城
遵化等州縣擢知景州民間產子例納官稅光辰屏勿受有
富豪強姦流民婦致死無知者光辰廉得其實按律治之卒
於任子堃阜康縣丞有循聲孫惠鈞甘肅知縣死狃逆之難
汪潤字玉恬德綸子道光壬辰進士授工部主事累晉郎中歷
都水營繕兩司例案紛歧吏胥叢弊潤先後主司稿姦猾皆
斂手在部二十年上官倚之咸豐元年以協辦大學士杜受
田薦邀 記名逾年監督坐糧廳總八省漕儲北通糧務剔

除積弊次第就理秩滿加道銜授撫州知府未上留辦海運
旋授廣西左江道便道回籍以病乞休潤素家貧洎通顯凡
里中鄉會試及因公入都者輒樂爲東道主兩充順天鄉試
同考所拔多名雋與門下士氣誼尤篤

張際春字煦坪道光壬辰舉人授沔陽州學正喜育人材士習
蒸蒸日上值粵匪陷沔際春練鄉勇隨大軍克復保升鄖陽
教授適賊竄安襄各屬鄖郡告警隨郡守總戎督兵出勦以
功加鹽運同銜

劉秉琳字崑圃咸豐壬子進士授寶坻知縣治獄多所平反雜
徭不便商民者胥除之會僧親王駐天津令州縣備樹株爲
禦敵長柵有索倫兵擅伐縣民墓田木復詭以村民繫馬稟

翼長札索村民急株連且數十家秉琳單騎赴營晨立礮臺
下敵礮飛過頂上屹不動日晡獲見翼長從容陳說民得直
兵自是不敢肆九年調任宛平革票規防私押請託者屏不
聽十年洋人深入當道檄秉琳等赴其營議犒具同官多恇
怯不前秉琳曰自古怕死者皆轉念誤之耳遂獨往與之抗
論不少屈洋人禮之犒具悉如我議嗣任深州知州髮賊撲
城秉琳固守四十餘日賊環攻七次悉力拒卻城卒全升正
定知府政聲益著其開井區田水利蠶桑皆善畫興勸有成
效後分巡天津河閒兵備道辦賑治河堅忍耐勞循良爲一
時冠移病歸卒直隸紳士疊次籲請大吏疏奏奉

旨事蹟宣付史館並附祀天津會國藩專祠秉琳少酷貧嗜學尤勵

行誼清操亮節歷晦顯如一致焉著有朔風吟草二卷

羅田縣

黃惟鍛明拔貢生 國初官廣西右江道後擢貴州按察司僉
事兼貴陽兵備道時黔江甫定政務殷煩惟鍛廉正公明宣
布善政所至官吏胥役悉遵法紀

徐熙明字子甯重謙子順治辛卯舉人官湘潭教諭擢汾陽知
縣寬賦減刑丁外艱服闋補永新知縣從征南藩辦理糧餉
疊著勞績後因疾致仕歸

周光垣字勝木歲貢生任湘陰訓導捐修學宮土苦徭役力請
得免時吳逆叛據誓死不屈棄官屏居以終

陳之瑄字正功雍正癸丑進士授興縣知縣興爲簡邑土薄賦

少尚沿丁稅餘弊民間生子必呈縣入冊吏緣爲姦致生子多不舉瑄力禁之永著爲令至今生齒日繁皆曰陳公所活也蒞任甫六月以事改安陸府教授囊無餘錢襍被猶自羅載往者民皆攀轅泣送

何昇字晉風由拔貢生中乾隆丙辰順天鄉試歷任德清秀水仁和等縣知縣勤敏爲一時冠大吏器重之後調河南湯陰邑爲南北通衢差役煩重昇慈惠愛民而才足以濟之甚有政聲著有步齋文集

周室鼎由行伍隨大軍至黔時黎人背叛黔粵搖動鼎設奇制勝以萬人破賊十餘萬邊境肅清累功陞總兵官

蕭光詠字芳岳乾隆庚寅舉人任甯鄉知縣勤政愛民民不忍

欺以不阿大吏被劾去

陳景程字雪門乾隆己酉拔貢生本科舉人官沔陽學正清潔自矢人不敢干以私兩江總督陸建瀛時爲諸生程一見推偉器極意栽培俾得騰達遷常德府教授致仕後截取知縣不赴改就中書子瑞球瑞琳俱詳文苑

郭地鵬字華亭乾隆己酉舉人學問淵博時知縣姜廷銘重修邑志鵬悉心採輯又創建興賢莊捐置瘞地闔邑頌之後官漢川教諭留意人材受業諸生多敦品勵行者

張文鱗字藻香嘉慶戊午舉人署靈石知縣補授壺關縣在靈石時舊例按丁納稅吏緣爲姦民不堪擾鱗概爲釐剔民德之爲建生祠治壺關六年以實心化導去後民思慕不置充

庚午辛巳兩科同考官所拔皆知名士大學士祁寯藻出其門後祀壺關名宦祠

閻海宇晴皋嘉慶甲子舉人館於都下賈相國楨昆弟皆從受學後官應城訓導甫至即勸修學宮城郭凡孝義節烈無不表揚教諸生以敦本崇實造就甚多會水災出俸貸粟哺饑民存活以千計內擢翰林院待詔致仕歸主講義川書院師範端巖士林欽服

潘光照字朗垣嘉慶甲子舉人任襄陽教諭性嚴毅人不敢干以私接見諸生惟以敦品勵學相勸勉暇日輒喜吟詠著有自怡詩草襄陽游草

郭潤字蓮墀嘉慶丙子舉人授永福知縣僅攜一僕往興學校

勸農桑循聲卓著時粵匪蠢動大吏知其才調署天河襄理軍務以功遷甯明知州未行卒於任邑人哀之孝廉張某輓詩有停春父老驚相告扶櫬妻孥尙未來之句

潘煥龍字四梅道光乙酉舉人初任涪川知縣興學課士文風大振移商邱甫下車河決金龍口城不沒者三版煥龍帥吏卒塞之貸粟哺饑全活甚眾時用兵臺灣商邱為戎車孔道民苦芻茭無所出煥龍自購給又以計擒擒匪誅其魁民得安堵尋告歸養親事畢需次山東會堂邑歸民鬪漕幾致亂單騎往定之旋履鄒平任治理一如涪川商邱時適大吏某行部悉索甚遂解綬歸煥龍績學工詩少時才思清綺長游京師與吳嵩梁會煥陳沆輩相切劘所詣益進著有四梅花

屋集臥園詩話子肇鏞字濂舫道光癸卯優貢由教習用知縣值粵匪躡楚辦理團防以功保知州陝甘總督楊岳斌知其才檄入戎幕積功累保候選道

節縣藝文志本傳

郭紹華字秋丞道光戊子舉人任光化訓導教人以修身立品為務貧士入泮輒助以貲咸豐五年河口鎮釐局滋事聚眾數千時下游髮逆猖獗人皆惶懼縣令欲請兵紹華止之集士紳開陳利害眾遂解散

匡慶榆原名一青字星芝道光丁未進士歷署故城隆平等縣知縣補肥鄉聽斷明決以獲劇盜功保陞同知因親老乞養歸里服闋爵相李鴻章督師東征檄辦營務復經理嵯政於荆襄閒盡心籌畫北師資以接濟旋以疾卒於差次著有詩

經序註正指客宿消寒筆記

張紹春字益三家貧好學事母孝同治壬戌舉人署伏羌知縣時猶逆甫靖伏莽尚多紹春為緩征輸修守禦士民安堵會潰勇叛圍其城紹春登陴固守值援兵四集內外夾擊大破其眾旋題補大通知縣未上卒

廖新字琴舟以通判試用安徽任鳳陽府判頻年水旱請賑濟饑每訟牒至前判斷如神丁艱歸以練勇功保知府服闋赴皖署潁州知府調署滁州值大亂後招流亡勸開墾設義塾以培士林暇則登豐樂亭召父老詢問疾苦滁民慶更生卒後滁人祀之於豐樂亭

節縣藝文志本傳

余萬明字玉昆少貧為里塾執爨有相者至曰此大貴人也塾

生皆竊笑咸豐初粵匪躡楚中萬明投官軍爲選鋒屢著戰績不數年洊保提督充豫軍統領同治間奉檄至甘肅剿逆總督熙齡稱其有大將風密疏保薦萬明益感激誓立功嘗臨陣手蛇矛躍馬直前礮洞馬胸仆地更易馬大呼入賊壘獲勝乃返又嘗夜攻哈密狗營計洩被執狗恨之刺骨將百計毒苦縛於梯倒倚石壘上會守者稍懈明奮身躍梯飛立壘外縛繩寸斷竟得返然終坐失律褫職久之復其官後狗逆肅清萬明無所施又身被三十餘創遇陰雨輒痛楚以疾乞歸逾年卒

閻定邦字協臣幼與羣兒戲以兵法部勒其曹皆驚慄咸豐間粵匪竄楚定邦年十六投筆從戎至武昌大營累功保守備

轉戰河南時狗匪猖獗奉檄赴甘肅拊循士卒與最下者同甘苦每戰必先登所向輒克前後斬馘以千計梟著名賊目以十數提督雷正綰將軍穆圖善總督左宗棠皆奇其勇略洊保提督博勇巴圖魯嘗鏖戰涇州飛礮洞胸達背猶裹創督陣歸營延醫以鐵鉞出之痛絕復蘇後以竹筭寄家中局甚固屬云非我死勿啓沒後家人啓視則血衣一襲卽受礮時所衣者蓋預爲招魂虛葬地也後逐狗至金積堡創發卒年僅三十有三左帥上其事

賜祭葬事蹟宣付史館定邦好詩書尤培植士類嘗捐餉銀二十萬

請大吏奏廣本邑文武學額各二十名士林頌之

節縣藝文志本傳

石磊字子英少負大志喜言兵當粵匪蹂躪斬黃遂投筆倡義

旅以捍衛桑梓自任每與賊戰所向克捷巡撫胡林翼稔其
才以布衣保授從九旋援例得縣佐襄事豫軍將軍穆圖善
素聞其名檄赴甘肅協理營務凡邊塞形勢勦撫機宜千里
懸決如指掌以功洊保知府乞假歸卒

張珏字玉坡諸生粵匪竄境辦理團防累保通判嗣襄安徽巡
撫李續宜軍務援六安州以功洊陞同知同治二年大軍駐
無爲州賊眾數萬圍攻援絕糧匱殺馬以食珏曉以大義士
卒咸感奮苦戰月餘賊受創遁擢知府因母老乞歸

勸州

張效葵字叔向邦翼子明天啓甲子舉人順治中任鹽亭知縣
縣多蕪田葵履畝清丈民賦始均又牛斗亮等以傷人抵命

案既成葵訊知其冤皆平反之尋擢延安府同知益著聲績
李本晟字暘若樾子誕時祖際春夢人冕紱輿從止於庭自言
唐西平王因名焉順治己丑進士以主事授廣西僉事分巡
蒼梧時西粵用兵督餉飛輓毫無匱乏常率輕騎撫徭獠定
陸川博白山寇遷雲南按察副使建義倉招流亡出俸勸義
緝贖被俘男女陞雲南右布政後奉裁歸里值吳逆變以晟
久轄滇南密遣謀授偽劄晟縛以

聞起太常卿轉大理卿巡撫浙江晟天資厚重與物無忤歷官中外
三十餘載正己率屬屏絕苞苴蕭然若寒素撫浙時以迎
詔使坐江亭中諸司獻食不受忍飢竟日歸而疾作遂卒遺表上
賜祭半壇浙人祠祀之著有三楚文獻錄知天閣諸書

參通志

顧咸泰字斌素天祚子順治辛卯舉人任大名知縣禦水災廣積貯除妖尼弭盜安民卓著聲迹告歸縣人立石頌德建祠

以祀著有石倉詩補行世

大名縣志

高培字茂先順治 恩貢生官衡州府同知歷台州知府時八

閩不靖浙東諸郡靡不被兵自永嘉丹巖失守章安遂爲危疆培調輯軍營訓練鄉勇請蠲賑均徭役人心以固督撫上其事陞分巡溫處道在任十年致仕

張承瑞字帝先順治歲貢生授甯德知縣首清社夫里役築礮臺禦倭寇修趙公橋以便行人時防帥恣軍剽掠爲民患瑞單騎諭止之及歸甯人勒石紀績後補滋陽知縣屢奉憲檄駁審疑獄昭雪二十餘人著有好生錄

張承位字生共邦翼孫順治丁酉舉人任桐鄉知縣興賢愛民務行其志縣有猾吏位欲寘之法吏倚勢家散法上官曲縱之遂移疾歸

陳言先字以詞幼失恃事父至孝順治歲貢生授九溪衛教授其地獐苗雜處人不知學言先多方造就庠內外皆彬彬爾雅舊衛屯諸生貧者多典出造運罔措爲請於衛守諭典者得半價以贖無力者輒爲捐助漕賴以濟告歸年九十三卒李本衍字介繁康熙歲貢生授朥城知縣除弊懲姦育士恤貧不遺餘力朥城舊多盜官不能制本衍相地要害築望樓伏丁壯設法誘擒之大盜屏息歲大旱本衍晝暴於日夜露宿三日大雨委發沙西賑因粟竭盡鬻家產以濟民始得蘇去

任時送者皆爲泣下

李坦字我平增廣生援例授亳州同知經理江南八旗糧餉歲省帑金數萬陞趙州知州甫渡河遇饑民老幼挈行坦給資令歸鄉土面遣者以千計下車逢奇旱禱之立應發官倉貸民穀種歲乃有秋尋遭蝗害饑民載道坦設廠爲糜捐置寒衣千餘領境內德之卒祀名宦祠子永昇詳篤行

熊心璋字公朗康熙戊午舉人授彝陵州學正一以端士習興文教爲己任捐俸改修學宮釐祀事定課程與人語必勉以道誼諸生質辨經疏皆厭所請而去繼補廣濟教諭一如在彝陵時著有芝麓山房集

王永圻字公錫八歲時避獻賊亂與家人相失落水漂流百里

外能知其父母所在人咸異之康熙中以歲貢生授嘉禾訓導修文廟嚴課程事詳嘉禾志先是爲諸生時于成龍總督兩江聞其賢聘教其子蘇松巡撫于準其徒也

張仕渾字近愚康熙丁丑進士初授保定知縣後任清水五充同考官所得多知名士五十一年夏邊陲告警軍書旁午仕渾篆佩八邑屢著勳勞其文縣近地熟苗勾引外苗搶劫仕渾單騎入其砦諭以忠義眾苗羅拜散去泰安連邑染疫癘仕渾齋戒牒城隍疫遂止凡所至皆以潔已愛民稱

張仕學字琳山康熙己卯舉人任沅陵教諭興學造士無忝厥職尋署辰州教授會永順司苗民猖獗督撫委諭悉歸順加軍功一級又委修辰河路工完固民咸德之弟之梁自有傳

張之梁字劍川仕學弟康熙戊子副榜任崇陽教諭造士有方
學田被侵者清還之作貧士膏火又石城古堰注田三萬餘
畝學田居其中梁欲爲士民計久遠派工修築早無竭澤堰
戶立碑頌之

陳常字藝極由廩貢授邵陽訓導勤於校課一時知名士皆出
其門以母老乞歸家居尤多義舉子欲珍字席聘由廩貢授
恩施訓導築館舍贖學田定課程邑人爲立碑紀其事

陳履中字遠登乾隆乙丑進士未赴選會教匪馬朝柱謀逆履
中偵知星夜赴州以變告復捐貲募勇從知州李秘設法剿
捕事平授貴池知縣多惠政解任池民攀轅不忍舍脫雙履
供奉城隍廟中每城隍誕辰同前循吏某所留錦袍捧獻之

並祀名宦祠

劉萬甯字襄堂遐祚孫乾隆丁卯舉人授石首教諭修學宮增
牆高三尺許以培地脈石邑自後科第相望又與知縣黃謀
建石壇書院於學宮前指授生徒從遊者眾縣有疑獄陳氏
子幾以無辜抵罪甯力白其冤出之同里孝廉呂士模卒於
都甯爲之治喪具歸旅櫬著有蓼懷堂文稿子之棠詳文苑
陳良翼字孔十乾隆癸未進士除福安知縣調福清督撫以卓
異薦調諸羅越二年陞嵩明州知州因母老乞養旣得請矣
會有疾未及歸而林爽文作亂陷諸羅良翼就縛縣民奔救
之曰奈何殺我好官得不死當是時爽文犯臺灣不得逞遁
歸大里杙餘黨留諸羅良翼遣人密言於府率義兵會總兵

柴大紀復諸羅遂奉檄復知縣事諸羅居臺灣南北之中於
時彰化鳳山相繼陷府城倚諸羅爲屏蔽故爽文圍益急而
良翼之守益堅嘗兩獻策於大帥請乘虛搗其巢又請出奇
兵夾擊皆不省而援師遷延至刺臂血爲書亦不應乃深溝
高壘激厲守禦無虛日自六月被圍迄於十月火藥竭兵民
食且盡良翼禱於神以油粃爲糧士民皆忍飢荷戈以俟大
兵之至而府城遂得恃以無患事旣平追論餽道府節禮革
職又在圍城審錄俘獲具得疲癯老弱有保證者數十人力
爭於軍門釋不殺而勉從大紀原奏以己戮報迹涉扶同擬
斬監候讞之日士民皆翕然同聲猶謂良翼保全無辜泣數
行下也

上察其情釋令回籍越一年入都祝

萬壽恩給知州原銜丁母憂歸旋卒著有三生瑣談二卷諸羅守城

日記一卷

參通志

陳準原名錦階號笏生嘉慶癸酉舉人任蒲圻訓導公安教諭
陞知縣初署山西應州潔己愛民前官沒於任虧帑二千金
準慨然代償權和順縣清釐積案革除私稅民咸悅服後歷
長子平魯二縣亦多善政卒於官

陳鑾號芝楣先世蘄州人後移籍江夏嘉慶庚辰一甲三名進
士授編修道光初由江蘇知府歷官兩江總督初守松江創
行海運釐定章程十餘條漕艘無滯海運之利自此始調江
甯值水災流民蔽江下捐廉籌賑全活無算遷上海道濬吳

黃州府志 卷之二十一
淞口置救生船於黃浦江陞江蘇布政使築寶山華亭兩邑
海塘計數千餘丈開太倉州昭文縣河以興水利其開藩浙
江峻太湖隄岸巡撫江西修沿江圯岸一如在江蘇時官兩
江最久如立義倉驅旱蝗弭礦稅修前賢祠墓以彰忠節培
江浙書院十餘處以植人材善政不可枚舉

上稔其賢勞

特旨溫慰擢署督篆兼權河督察吏鋤姦閹河巡海皆以實力整頓
積勞成疾卒於官遺疏入

上震悼

贈太子少保長子慶涵

恩賜舉人江南人士立像於滄浪亭祀之並請祀名宦祠鑾少有至

性事親一循古禮更友于兄弟殫心學業方未第時兩江總
督百齡聞其賢禮之幕中於三省吏治河防漕務鹽筴營務
海防早留心講求故及身措之裕如也督兩江時預知邪說
必興奏請推闡

聖諭中黜異端以崇正學一條

上嘉納

敕翰林院撰四言韻文頒行各省學政恭書刊刻徧諭鄉塾倡修江
夏縣學宮刊碑示後大觀書院燬助新之值楚省災傾貲協
賑無以飢寒滋事者厚於宗支於蘄州建家廟置祀產於江
夏仿范文正贍族之舉詳立規條

宣廟御書義莊二字賜之著有先正格言十卷集兩湖歷代名賢墨

黃州府志卷之二十一
蹟十卷耕心書屋詩文集若干卷

陳懋烈號灼亭道光甲午舉人歷將樂福鼎漳平等縣知縣所至多惠政陞澎湖通判民叩大吏乞留不得焚香泣送旋陞知府引

見奏對閩中吏治稱

旨加道銜授臺灣知府會戴逆作亂勢猖獗懋烈不動聲色勦撫兼施逾月獲其魁寘之法事平署臺澎兵備道兼提督學政練兵籌餉校士衡文悉臻妥善後署興化知府卒

江筆華號穎卿廩貢生署興國州訓導德安教授值髮逆亂知府阮福委督隨州團練未幾賊踞郡城筆華從候補道金國琛參謀戎幄請就城北近河以桶盛沙塞下流積水灌城賊

必退金如其言賊遁時廟學試院俱燬新任知府王知筆華有幹才專倚修治閱數月工竣後隨藩司唐訓方辦軍務累保知縣加知州銜

廣濟縣

胡一埏字公侑順治戊子拔貢生任兗州通判先是香鑪口河決久弗治埏躬督畚鍤悉心籌畫功成總河朱之錫特薦陞東昌府同知兼攝推官平反大案二十餘起擢戶部員外歷郎中出權龍江關以廉著會荆襄長隄衝決埏請帑修築兩郡賴焉遷廣西道以路梗留廣東兼筦學政逆藩陷城授以巡撫偽劄抗節不受及大軍恢復事

聞授廣西布政使數年致仕歸清貧有踰寒素築室春風橋畔人莫

知爲方伯第也年九十卒祀鄉賢子搢思詳忠義

張先基字開有順治己丑進士授棗強知縣讞大辟獄十餘起活其矜疑者十二人鑒拔人材尤有卓識於諸生中得宋師祁於童子中得鄭司直端張殿揚鄭穉王佃等棗強人物自是稱盛先基生有至性事繼母如所生待異母弟極友愛兄嫂繼喪撫遺孤如己出親伯叔之嗣殯葬盡禮置田供祀事族黨貧乏者咸周恤之卒祀鄉賢弟斌基能詩著有宛彼堂

集

王志入孝義今依縣志移入

梅朗中字雪侯順治己丑拔貢生授甕安知縣調建水知州值土司錄昌賢之變附郡被脅誘揭竿起朗中請宣德威給牌示信凡赴治領牌者卽爲良民焚人爨人遂相率歸順後擢

戶部郎出知成都府告歸年八十八卒祀名宦鄉賢子奕庭歲貢歷武岡訓導銅鼓衛教授每月朔聚諸生於明倫堂講學尤喜培植寒士咬庭爲青浦知縣開浦匯塘故河四十里詳請黃波鎮南漕改折六千石青浦便之以剛直忤部使者落職英庭歲貢生謁選都門同鄉不得歸者傾貲以助金盡不能得官卒無悔

胡魁楚字爾大能文篤行誼事繼母能得其歡心順治中由歲貢生任建平知縣建俗貧民多以其妻質錢於富室踰期不償婦不得歸魁楚痛懲之俗頓改建平距省會四百八十里童子試於縣有名例得免更徭而入選者率以賄魁楚拔單寒生二十人學使取半之邑人大服邑有以姦殺人者前令

黃州府志 卷之二十一
屢訊不能決魁楚齋宿城隍廟三日庭鞠案乃具後以治獄
不撓忤監司意拂衣歸建平人焚香祖道有遠至蕪湖關者
卒祀鄉賢孫復亨詳文苑

李必泰字元關順治庚子舉人任蒲圻教諭取家藏粟麥泛舟

西上售以葺廟學修垣墉增廡舍別構雪堂賓延文士騰觚

飛爵風流豪舉名藉藉江漢閒妻陳氏常脫簪珥治具家日

落無怨言泰祀蒲圻名宦

參居業齋集

張金基字寶持明季奉母避亂江南山峒兵猝至妻金氏被執
不屈碎腦死金基弗顧負母疾走得免母不食累日命幾殆
金基嚼雪水哺之漸甦後中順治庚子舉人授沔陽州學正
教士有法一時稱爲人師卒於官櫬歸諸生數百人哭送江

上祀安陸名宦

王志入孝義今依縣志移入

吳瑾字璞懷康熙庚戌進士任萊陽知縣課最擢任蒲川清馬
政減羨餘治行藉甚丁艱服闋補滄州滄州旗丁駐牧地瘠
而賦多逋瑾委曲籌畫輸將及額有宵壬馬七馬八句連黨
與爲河閒諸郡患刊章名捕莫能得瑾至榜諭導以自新羣
姦羅拜階下乃上其名數於大府寬宥之姦黨解散入補刑
部員外郎以疾告歸至保定病沒同年友參政邵九緘任含
殮之役先是瑾在蒲以古鑪餉九緘款識繫千年物瑾沒九
緘乃出鑪伴其櫬以行寓書誠其家世守之

參居業齋集

朱翼治字簡臣父懋乾諸生有善行翼治援例授兵部員外郎
有湖南黜革武生三人拘繫都門同官不聽回籍翼治以告

貴州府志卷之二十一
在可宥降從輕典遂得歸素饒於財翼治從母王教廣施予人咸德之卒祀鄉賢

胡振雄字英吾有膂力嫻韜略康熙中吳逆反振雄從軍雲南有功總督趙將軍敘給總兵銜時逆黨披猖圍城急糧將盡雄誓眾死守逆兵退補右鎮總兵後從征馬鞍山身負重傷猶手刃劇賊二所向無前尋致仕歸

金啓洛字禹書德嘉子康熙戊午拔貢生由教習授廣宗知縣值軍興需騾馬他縣多取供里下啓洛悉出己資購辦五十五年雨溢鄰民蜂擁曲防與廣宗民相持甚急啓洛單騎入稠人中問曰此水能倒流乎眾愧服而遁廣宗民德之後擢東昌知府除陋規千數百金又護城隄決溺水者眾捐俸拯

之全活無算

張佳晟字晉天仁熙子邑有山曰紫荆坪宋余義夫讀書處也晟構室其側居五年徧覽羣籍中康熙甲子舉人授沅陵教諭沅界五溪苗獠學宮廟制荒簡無名宦鄉賢祠晟捐金修葺兼修縣志立學規凡事之有裨風化人文者悉次第舉陞安陸教授嗣子錫崇舉人官枝江教諭課士嚴毅邑中言師範者推焉

張元爵字其修康熙乙丑拔貢生授安化教諭訓飭多士以敦實行崇正學爲務每月分題課藝入首選者助以膏火自是鄉試多獲雋五十六年歲大禋元爵具關代民借義倉粟五千石分給民賴以甦後擢壽光知縣謝絕餽遺邑中積弊革

黃州府志 卷之二十一
除殆盡引疾歸卒年八十有四

游挺秀字豹文雍正甲辰舉人授萬載知縣廉潔不名一錢上官某頗黷賄以其無所獻也詭索鸚鵡百以示意挺秀佯不省籠百鸚鵡與之上官恚甚吹索其疵遂罷官士民資之始得歸

通志

劉天成字鴻生雍正歲貢生任蒙城知縣摘姦發伏案無留贖建義學拔單寒士風日振遇歲旱禱雨輒應蝗災拜之息謁上官請免積逋竟致訶譴毅然告疾歸族里閒婚喪不自支者必委曲扶助之卒年八十有二

劉茂溶字華生登仕子以叔都統志陞廕補中書值討黔苗從軍有功洊陞廣州知府州濱海三十六嶼商舶叢集有巨盜

劫掠殺人與姦牙相表裏前官利其賂率不問溶稔知之與牙人約有劫商殺人者即擒牙實諸法由是海嶼晏然建義學資膏火刻廣東文選卒於官

楊承綜字亮采雍正庚戌拔貢生授黟縣知縣力懲刁悍良民獲安調嘉興治獄多平反鄉民馮綸音被盜苦株連鞫得其實釋輕罪者五人時稱明允改補石門以勞致疾歸卒

方楚正字鍾靈乾隆丙辰進士授洛川知縣捐社倉米五百石添建書院房舍十二年鄰邑大祲就食洛川者踵至楚正嚴保甲法更不時親歷以安集之邑得安堵

徐天球字卿石乾隆乙丑進士由知縣擢順慶府同知委辦西藏糧務西藏明烏斯藏地土人分爲三部曰康曰衛曰藏均

有大員駐藏防護而漢官輪運糧糈凡內地徇民與土番交
易拊循無術輒致流亡天球加意懷來各得其所艱歸服闋
遽以疾卒大吏咸悼惜之 通志

郭本才字楚士乾隆戊辰進士授安縣知縣創書院置義倉嚴
捕囑匪兇暴斂迹再任崇明時颶風大作邑被潮災物產蕩
然本才履畝詳勘立報大吏按戶給賑無遺無冒調繁無錫
甯靜不擾吏民畏懷以捕蝗致疾卒於官 通志

陶廷喜字良菴乾隆丁酉拔貢生授嘉魚教諭時祖文萃以舉
人官孝感教諭父大朋以舉人官江陵訓導一門三學博人
以為榮會教匪披猖喜隨營有功擢河南温縣知縣前令虧
帑甚鉅喜代為填繳河內窰戶婦與人有私謀殺本夫而匿

其屍案久不結承審被黜者十一員喜至盡翻前讞釋姦夫
而賞之輿議沸騰比夜選幹丁潛抵窰所獲姦狀啓屍於窰
底獄乃決邑稱神明自是豫省疑讞悉以委焉

魏雲瑄字白崖洪賓孫廩貢生任嘉魚訓導時孝邑旱災上憲
遴委辦理井然有條全活甚眾調四川龍安府經歷總攝清
平等關茶務甫視事以榷稅繁重言於上官汰其浮者閱半
載清積贖六百餘件士民稱快告歸祖餞者數十里

饒玉振字特軒嘉慶庚申副榜任宜都教諭署宜昌教授性純
篤宗族以孝友稱在官訓士先孝弟後文藝十年不倦宜都
向無賓興館 大成殿亦圯玉振咸興復之歸里後築娛老
軒日默誦義經一過卒年七十有八子豐詳文苑

文鳳階字丹山道光己丑進士授絲竹知縣時徇民煽亂階聚鄉團平定之上憲奇其才委任西藏軍糧府藏民獷悍不馴階因俗為治政令肅清三年復知絲竹以母艱歸

劉映丹號慕韓鳳詔子由拔貢生中道光辛卯鄉試丙申成進士授庶吉士散館改平陰知縣下車觀風得孫永錫卷奇其文延至署親教之後成進士己亥充同考官得士十二人副榜第一為濟甯于如川庚子復入闈得一卷頗類于生薦之主司拔置第一及拆卷果如川也山東傳為佳話在任三年請緩進賦勸置社倉增書院膏火士民賴之調商河力懲刁悍遠近肅然以艱歸不出優游林下者二十餘年著有馬稷山房詩鈔子宗沅由拔貢中同治壬戌鄉試才思以敏捷稱

張殿賓字禮臣幼聰慧讀書目數行下道光丁酉拔貢生本科舉人丁未成進士授荊州府教授構講堂課士專崇實學從遊者每歲數十人荆南文風為之一變

魏邦達字實甫咸豐丙辰進士授萬載知縣時粵逆竄江右圍其城邦達團於鄉得練勇二千城圍以解大吏奇其才檄擊新昌上高等處踞城悍賊賊退保陞同知直隸州旋權河口同知篆乞養歸服闋襄理釐金總局又辦貴溪釐務皆勤慎不避嫌怨並稟請杜諸卡積弊大吏嘉之尋以疾卒

夏琮鼎字甲臣咸豐辛酉拔貢生

朝考以知縣用分發江西署貴溪知縣興文教育人材季課額獎外更捐給膏火士林稱之聽斷明決獄無冤民如建堂育嬰

恤孤貧修橋梁諸善政不可殫述歷署進賢分宜民情愛戴一如任貴溪時生平喜爲善嘗撰訓俗格言以警世同治十年以父艱歸明年卒於家

黃梅縣

石鎮國字球公明崇禎癸酉舉人順治初膺薦由戶部郎中任永平道建學崇祀懲豪民之兼并者轉安廬兵備道時劇賊朱統錡據飛旗砦勢張甚鎮國駐兵太湖與操江御史李日芄合兵攻破之用計降其餘砦擒統錡於英山羊角河皖北獲安宿松德化黃梅接壤地曰段姚濱大江歲有水患檄會三省建長隄民戴其德稱爲石公隄調浙江杭嚴兵備道以老乞歸

蔣昶字昇公與仲兄文同舉崇禎壬午鄉試順治時任邢臺知縣邢有大案株連甚眾昶至爲之開釋編審丁額減除故絕七百餘丁他如興學校營公廨清郵遞善政不可枚舉邢民德之立祠以祀著有月燈文稿

張澂字眉有順治甲午副榜康熙七年授粵都知縣政務簡靜十三年閩變起他部助亂者據厓石山擁眾至城下澂開城以待賊疑其有伏信宿退去擢雲龍州知州

江西名宦志

梅開瓊字公璐順治歲貢生授巴陵教諭每月吉聚諸生於明倫堂諄諄教督復躬自採訪有實行者嘉獎之一時士風丕變

石定烈字咸可康熙辛亥拔貢生任沔陽州學正以卓異授安

義知縣冰清自矢勤於聽斷邑素苦差擾爲立徵限蠲逋賦
革陋規安民德之

廖應拔字豈尤父士貞在營山任被賊執拔聞變赴救刃傷頭
顛幾死以廢入監授汶川知縣拊邊地馭土司振興文教民
始知學兩權灌縣篆疏濬九都水堰諸邑利賴民間頌曰廖
公兩世來官於蜀移孝作忠遠邁廉叔

石爲藝字漱芳鑑子博覽載籍以詩古文鳴於時乾隆壬申成
進士歷任泰興溧水寶應知縣累著循聲調任崇仁未一年
積逋一清有貴人投刺者爲藝以其族人方有訟待讞堅拒
不見蒞官十餘載囊橐蕭然參通志

宛建侯字禹三乾隆庚辰舉人補長甯知縣寬厚樸實本儒術

爲吏治始受事值歲祲捐貲平糶施粥以德和民閱七年士
學民風與化移易以卓異調上饒病卒

胡攀龍字介眉乾隆甲午中鄉試第二名官思恩知縣學問淹
博初在京就館於大學士彭元瑞館僮有繆姓貧而慧異之
商之彭得與其孫伴讀資給衣履數年學日進爲醵金納監
旋中京闈在思恩獲山中謀亂者數百人訊之多蠢愚攀龍
曰此非梗頑特失教導耳爲垂涕曉諭皆感泣因盡釋之生
平盛德事多類此晚年告歸主講調梅書院卒年九十有一
喻文鑾號嵐波于智孫乾隆甲午舉人大挑知縣嘗署直隸藁
城事以兄文鏞守正定迴避改山東署惠民調淄川所至以
廉能稱藁城瀕河歲斂民錢數千築堆護之迨河他徙斂如

故鑾曰此錢何名亟罷之又爲除差徭平官價一邑如釋重負在惠民時前官不省獄囚多凍弊爲製棉衣調方藥全活甚眾邑漕運久困丁弁悉索值開徵愀然曰竭萬姓脂膏爲若輩飽饒吾不爲也力求去旣而山東虧空案發州縣官多罪吏議鑾獨超然事外人稱明哲焉著有春草園詩集子元需自有傳元涪嘉慶庚午副榜署石埭知縣時太湖漕號難治控訐蠶起涪奉檄監收委曲調劑囂爭立化

喻文鏘字引山于智孫乾隆丁酉拔貢生歷任懷遠涇陽知縣留壩廳同知晉蘭州知府被議開復改正定調保定陞通水道丁內艱歸生平明敏精勤自縣令迄監司所至功施卓著如築懷遠城修涇陽鄭白二渠辦陝省教匪軍需防禦省垣

搜獲姦細創建留壩新城其尤著也守蘭州平反州民馬贊一案保全名節官保定首府每日發審案填委隨到隨判積卷一空嘗謂讞獄最難以鍛鍊爲明決譬如折生果而食之匪惟戕物抑亦自伐其性真仁人之言懸車時年甫六十優游林下人爭羨之子元準元沆俱有傳元澤詳文苑

石然號鏡湖乾隆丙午舉人授鎮平知縣時襄鄖教匪滋事延及汴境近鎮平然亟檄文武生議守禦修城練勇嚴緝旬引諭百姓無妄動境賴以安擢知鄧州以艱歸

石文彩字慕棠乾隆壬子舉人任宜興知縣值大水條陳轉運勸諭諸章程大府趨之檄合省一律通行又決王姓積訟擒土豪二人伏法遠近稱快以老致仕歸著有紫雲山房文集

石文漣號曼香乾隆乙卯進士歷任鎮洋上海陽湖吳縣知縣
性亢傲善決獄官陽湖鄰邑有謀殺親夫經驗無傷一案上
憲委訊漣微服密訪抵暮宿蒙館得其實係與所私用鐵籤
從尾間刺入死者明日提訊猝揭其隱語塞寘諸法又有控
鄰人推牆斃其子者急詣驗額掌有傷適椎髻女子在側辟
從人婉詞問曰死者汝何人曰阿弟曰吾知汝弟係汝抱擲
軼肩而斃因舉手作狀女泣然曰洵然父母屬勿言也卽時
斷結治他獄多類是吳人有石青天之目後以忤上官罷歸
帥承瀛字士登號仙舟少穎異年十七舉乾隆癸卯鄉試嘉慶
丙辰一甲第三名進士授編修累遷侍郎歷吏禮刑工四部
辛酉戊寅典試廣東江南癸亥戊辰督學廣西山東歷奉

諭旨讞案山西陝甘河南山東江南等省所至公正廉明人心帖服

道光元年巡撫浙江釐姦剔弊興利舉廢其大者奏請鹽政
改歸巡撫兼理停加課銀五十萬歲減商捐外款銀二十萬
庫帑無虧商民稱便杭嘉湖三郡大水請帑金留漕艘奏免
米販關稅以徠遠商全活饑民無算又捐費濬西湖修海鹽
石塘凡利

國便民者靡不悉心經畫

成皇帝嘗以一代名臣獎之四年丁艱回籍有應入平餘金八萬吏
以舊例告辭曰攜此何用留半作濬湖資餘以濟貧士惇獨
可耳浙人感之建生祠於西湖起復當詣

闕以目疾陳情家居十餘年爲闔邑置瓊林莊并闔族祀產數百

恩優卹子祭葬祀浙江名宦本邑鄉賢孫遠燁詳忠義

畝二十年卒遺疏薦濱州杜受田侯官林則徐語不及私蒙
張醅字步軒嘉慶戊午舉人任華陽知縣有政聲屢決奇獄有
寡婦子年未冠隨伯他讀清明告歸未抵家徧覓無迹伯被
控莫伸醅至詢知中途道旁半里許有尼庵卽僞爲貰繒者
私詣庵窺少年尼有身益疑之密遣人夜擲沙庵後近聽之
果徐聞女子焚楮私祝隱約稱相公翼日率眾圍庵掘後院
得屍嚴訊之係緣乞茶過庵困於羣尼致斃卽毀庵法治羣
尼斷少尼爲寡婦婦果生子伯得釋邑人神之後以獲盜功
擢瀘州知州卒於任

帥承洙字遵魯嘉慶辛酉拔貢生署攸縣知縣補藍山調衡陽

政績可傳者多其尤奇者攸有雉髮傭相戲其一人被推跌
坐水甕上笑不止頃之氣絕眾以爲推者毆斃推者弗能辨
甘抵償洙勘訊哀其情致生之邑人大服又有二人爭水隔
塘相詈一人舉鋤擊地一人應聲倒鄉眾鳴官述其異洙驗
視身隱隱青紫痕詫曰豈有隔塘能死人者乎命涸塘水有
足跡一線瑩瑩可辨洙曰世稱前生劫得毋是耶宜解不宜
結斷舉鋤者備棺殮爲服斬衰邑人愈服明允後遷岳州同
知子宗榆官袁浦鹽場大使遷遂安知縣以廉能著

錢灝字博海嘉慶辛酉舉人以太挑授武昌府學訓導擢荊州
教授甄陶士類不愧人師官武昌時與袁銑萬承宗爲文字
交同訂楚北金石錄等書一時從遊多知名士如古韻童輔

曹澍鍾其尤著者著有遜敏堂文集蠡餘詩鈔

鄧錦字綱亭嘉慶辛酉舉人任棗陽教諭捐修文廟費五百

金課士先行後文凡寒峻贊儀謝絕不受精岐黃術著有長

春錄傷寒新編諸書

蔣鏞字聲永父志坦官紫陽知縣值教匪至有全城功鏞登嘉

慶壬戌進士授連江知縣陞澎湖通判遷廈門同知歷著政

績任連江擒斬蔡牽幫匪數十名四境安堵有朱渥者沿海

為亂大帥以書招降渥宣言必得廉惠將翁來乃可鏞毅然

往曉以大義渥果心折就鏞前戮其不用命者數人隨率眾

投誠海氛立靖澎湖為臺廈咽喉兵民皆仰食於臺颺發米

難至鏞倡捐勸輸設義倉積穀萬餘石至今利賴

帥承瀚字海門承瀛弟嘉慶乙丑進士授檢討方梗不諧俗久

之以少詹事督學順天風裁益峻尋遷太常卿轉左副都御

史嚴持風紀人莫敢干以私有座師某相權重門如市瀚終

歲不一往及被譴出都眾畏禍莫敢近瀚獨厚贖泣送二百

里外其力矯趨避世態類如此兄承瀛撫浙時浙紳吏入都

者類來謁瀚署於門止弗見大學士蔣攸銛嘗有言曰二帥

雖兄弟然一主和平一尚嚴峻各極其是人以為定評卒葬

京師西山祀鄉賢子惺字根實性孤介以附貢取臚錄授徐

州運河水利通判勤敏廉潔後陞柳州知府未赴卒

喻溥原名元沆又名士藩字公輔文鑑子與兄元準同榜舉人

嘉慶己巳進士由編修改御史轉兵科給事中外和內直侃

黃州府志卷之二十一
侃不阿如奏請飭營規汰漕員查倉匪嚴督撫曲庇懲大幕
招搖皆關要務時同官欲以查獲賭博入奏溥曰此我輩應
辦事奚奏爲出爲雷瓊兵備道嚴立條規守令奉行維謹沿
海地面編排船甲互相盤詰立循環號簿按月親稽一時海
疆肅清大吏倚任之惜未竟其用而卒

喻元需字芥舟文鑾子嘉慶庚午舉人歷任博野知縣霸州知
州大名同知少隨父鑾任最久熟諳吏治初試用委辦發審
判決悉當有生員控一戶書案久懸提訊窺生貌枯瘠志苦
不伸而書肥面鮮衣情詞傲辨細窮顛末係挾本官爲奧援
者立答書生感泣曰數年覆盆今始得覩天日矣案結大吏
稱之曰能在官時率以除蠹安民爲急後卒於任

錢光選字萬青嘉慶庚午舉人歷署遂溪會同昌化知縣釐弊
除蠹卓有政聲補授瓊山瓊首邑政務煩劇措置咸宜有滯
獄片語折之邑人大悅臚列其治績勒石於堂

宛名震原名夢龍字兆鼎嘉慶庚午舉人歷任分水常山開化
知縣政尚寬平尋補餘姚最號繁難而沿海塘工尤疲於奔
命震至日夕巡勘加意修築歲事督辦大員將申詳敘功震
曰此中關天心民命告成而已何敘功爲生平喜論文三次
充浙闈同考門下士來謁必挽留數日縱論高談輿會颯舉
喻元準字萊峯文鏞子嘉慶辛未進士選庶吉士改禮部主事
轉員外郎中出爲柳州知府護理右江道調署梧州病卒性
疎略不事周旋久官儀曹辦事畢卽歸宅飲酒賦詩暇或習

射自娛達官貴人不一造謁當時有喻傲子之稱而公事諳練上下和協在柳州斷獄恤商撫獠練勇卓有政聲

帥承治字士安廩貢生隨兄承瀛廣西山東學使任襄力最多晚授興國州訓導訓士嚴正不率者斥之州胥陵轢紳士則必繩以法士氣得伸尋充江漢書院監院整飭學規一掃數十年蒙溷雜沓之弊山長袁銑歎以為得未曾有也

吳文林字寶書道光己丑進士選庶吉士授檢討充國史館纂修時列清班者多疎防檢文林獨謹飭端嚴不染習氣乙未充順天鄉試同考丙申充會試同考所得士必勸以正如河南周沐潤以名元捷南宮氣甚盛謁見文林曰才不可恃恃才適自伐也後官吳中果以傲慢獲譴人服其先見所

著有保虛堂文集

帥宗堯字鑑軒援例授無錫縣丞以保舉擢署華亭知縣華濱海多盜甫下車即擒治渠魁數人羣醜懾服道光二十九年大水隄塘傾潰大府籌辦賑恤堯固請展賑三月亟修海塘因儲備槌石躬親董理華人德之

宛立俊字偉甫道光己酉舉鄉試第二名咸豐己未成進士官刑部主事以保薦赴熱河充都統衙門理刑官廉惠平允無苛刻鈎深之習人懷其恩期滿保陞員外郎未任卒

補遺

黃岡縣 洪恩澤字惠臣同治閒由監生例選鎮平知縣在任數年建書

院修縣志設義冢省訟獄解組時囊橐蕭然

黃州府志卷之二十一終

